

華嚴經疏

用

C40
4514
215



C40-4514



B 64853

大方廣佛華嚴經疏卷第六

唐清涼山大華嚴寺沙門

澄觀撰

世主妙嚴品第一

從第二經
盡第五經

自下大文第七稱揚讚德分亦是發起序文中有三

第一總結威儀住第二此諸眾下總顯德行因緣第

三所謂下別明得法讚佛前中有三初結眾集次明

相異後顯意同今初數廣德深故名眾海起於自地

集空道場多數大身重重無礙雲之象也又浮雲無

心龍吟則起菩薩無住佛現爰來二無邊下相異也

本唯上列故云品類無邊旋環不空故云周匝遍滿



大小等形妍媸等色部主徒從各有區分故云差別
三隨所下意同也隨所來方參而不雜皆得見佛各
對目前其猶百川各全觀月同無異念故曰一心諦
矚欽承瞻而且仰不唯直觀丈六乃徹見法界身雲
第二總顯德行因緣者以上列中隨宜別歎今方總
顯德行齊均又與下別得法門以爲總故前同生衆
中共集善根亦是別故又前共集明主伴所由今會
攝受顯眷屬所以影略其文此文多勢且分爲三初
明離障見淨二如是下受化根深三種無量下德行
圓備初後是因中一是緣以因奪緣大衆自見以緣

奪因佛力令見因緣和合無定親疎故因緣間說又
初段德行現深後二因緣宿著久攝今見卽緣成因
感應道交故常居佛會今初離障見淨者煩惱卽煩
惱障也心垢卽所知障也此障翳心迷所知故言一
切者謂分別俱生若種若現言餘習者二障氣分麤
重麤重如畢陵上慢迦葉不安今皆位極菩薩智現
情亡證理達事心鏡瑩淨故云已離若諸位圓融一
斷一切斷亦通初位言摧重障山者通以喻顯以能
摧道摧二障山障體堅厚崇聳如山又別則智障菩
提惑障圓寂通則俱障及一切佛法故名爲重言見

佛無礙者斷障果也然有二義一就能見以明無礙由斷二礙智明理顯理顯故見法性身智明故見佛智身理智冥一見無礙身無礙亦卽涅槃二約所見明無礙者具十無礙已如上說第二如是下受化根深於中初總後別初中如是者指前斷障之衆劫海者明攝時曠遠言四攝者卽攝化之方謂布施愛語利行同事布施是攝緣與彼資持故愛語是攝體正示損益故利行是攝處安住善處故同事謂釋疑令彼決定故後一一下別示攝相於中向言劫海會攝何所攝耶謂一一佛所何時攝耶種善根時將何法

攝謂種種方便攝相云何謂教化成熟教化約始成熟就終攝意云何令其安立一切智道道者因也謂唯爲佛果修佛因耳第三種無量下德行圓備前攝何益令德圓故於中先辯因圓後入果海今初文有五句一種無量善已超七地殊勝善根故二悉已下已超八地大願滿故三所行下已超十地行滿障淨故四於出離下前明德圓此具出道一道無量道已超生死不住涅槃故云善出五常見下結成見佛謂德高十地是以常見非比量見故曰分明不取色相各爲照了又塵毛利海佛遍重重有德斯觀名分明

照了二以勝解力下入果海也此一段文望前是別
總具德中別入果故望後是總四十衆中解脫標故
今且屬前於中二初乘因入果是比智知如見鸞翔
知太虛可冲矚龍躍知宏海可汎也謂以勝解力印
可佛言知福慧之深遠以信解力瞻仰佛化知慈悲
之廣大是入如來功德大海亦是勝解印持果德二
得於下明分得果用言解脫門者佛果障寂大用無
礙故稱解脫真解脫者卽是如來通智遊入故號門
也衆各證契故名爲得此解脫卽門佛得其總衆海
得別又佛解脫但名解脫衆所得法稱之爲門以能

通入彼果用故此解脫之門又衆所得法離障自在
名爲解脫智所入處亦名爲門以因解脫入果解脫
亦稱爲門此解脫卽門然總別圓融因果交徹重重
無礙方爲真解脫門故下或歎佛果德或歎因行或
約天等所得欲影顯故次遊戲神通正明入相遊戲
者出入自在神通者難測無壅故約觀心者心境無
礙稱爲解脫由此入理故號爲門若以門爲門非能
通矣門卽如實何所通耶正入雙亡爲真門矣如此
入者則本覺湛然名窮果海真非妄外則因果圓融
心境無涯則解脫無際矣第三所謂下別明得法讚

佛四十衆中各先長行得法卽經家序列後說偈讚卽當時所陳然衆偈讚並在一時文不累書故編之作次而各得一者顯佛德無盡故乘別入總盡衆不能及故故海慧云如來境界無有邊各隨解脫能觀見而普賢得十者顯等佛無盡故文中先異生衆後同生衆前中三初諸天次八部後諸神今初分二先色天後欲天前中有五今初自在天長行十法第一法界等者卽法身解脫也法界虛空界卽用所遍處空卽事空法界之言義兼事理謂非但遍空亦遍空內色心等事及空有稱真之理又但言空則一重

遍今云法界則重重皆遍何者謂空界容一一塵處及彼事物一一塵中皆稱真故各有無邊刹海佛身大用皆悉克滿故下頌云無窮盡也言寂靜者體也然有二義一明前大用用無用相不礙常寂二由此智用卽寂同真是故隨一一用遍一切處也言方便者用也亦有二義一明前寂無寂相不礙大用二內同真性不礙外應羣機故云方便寂用無礙所以稱力二普觀一切法悉自在者智身解脫也此有三義一以普眼於一切法無不能觀二觀一切法不壞事而全理三於一法中見一切而無礙並名自在三知

一切法不生等者自共相解脫也亦有二義一知不生等內證真理二無功用行外應羣機然不生等佛法之體釋有多門略申一兩一別釋以不生滅約境不來去約行初不生滅略有五義一就遍計由是妄執無法可生滅也又情有卽是理無故不生也理無卽是情有故不滅也不滅不生是一法也又求遍計相不可得故不生能顯無相性故不滅不滅卽不生亦一法也二就緣起性謂法無自體攬緣而起卽生無生旣本不生故無可滅也又緣起無性故不生無性緣起故不滅中論云以有空義故一切法得成是

故不生卽不滅不滅卽不生爲一物也又推緣無起故不生能顯無生性故不滅三約圓成性謂非是有爲故無彼生滅相也又非妄心境故不生聖智所證故不滅又體非遷變故不生隨緣令法起故不滅不滅卽不生爲一物也四通就三性混融於一法上就遍計故不生就圓成故不滅就依他故亦不生亦不滅就三無性故非不生非不滅五然此四句合爲一聚圓融無礙頓思可見二不來不去者約行謂正智背捨妄執而無去向證真理而不來又依體起用而不去應機現前而不來又往應羣機而不去恒歸寂

滅而不來不來卽是不去無二爲一味也由此大智
無念應機如摩尼天鼓無思成事故云無功用行也
二通釋者不生不滅亦可約行不來不去亦可約境
謂妄念斯寂猶若虛空何生何滅又雖起大用見心
無生用謝歸寂了本無滅又常稱真理寂照居懷於
此心中有何生滅此約行釋不生滅也約境釋不來
去者猶如空華無可去來又緣會卽來來無所從故
無來緣謝而去去無所至故無去又諸法卽如如豈
來去三展轉釋又何以不生滅由無來去故何以不
來去由無生滅故又旣無來去則非一非異不生不

滅則無斷無常智契前理故無功用不礙生等故云
行也是則不生之生生之不生無功用故常寂行故
常用寂用無二是於功用得解脫也斯爲正法之要
義味難盡無厭繁文四現見一切法等者觀義解脫
也現見之言揀比知故真實相言略有三義一以智
觀事實事不虛故故下經文觀有爲法如實相故二
以慧觀理實所謂無相無相不相名爲實相三以無
礙智知無二實窮實故深盡邊故廣稱智慧海不爲
相縛是解脫門五與衆生等者慈障解脫也離諸危
怖曰安適悅身心爲樂見佛則獲二利故安樂也煩

惱不生故得定也佛德難思故樂定無邊斯爲大方
便也六令觀等者悲障解脫也衆生癡故造業造業
故受苦闇故不見未來不見未來卽顛墮故大怖之
極莫越愚癡令觀本寂則癡相本空尚不造善豈當
爲惡七善入等者業障解脫也佛現十方是無邊境
了無依性稱爲善入尚不依佛寧造業思入普徃十
方等者卽無相解脫門也雖身應十方寂然不動智
宣諸法怕爾無依不取於相如如不動故九入佛等
者卽名相解脫也佛智契如名入寂境寂而能應故
普遍十方身智發光又令物入無相故靜無名故寂

十中此天王名與前列中少倒前名極精進名稱光
上下諸文多有此例或義存名異或廣略參差皆譯
者不善會耳法門名住自等者此離二取相能益自
他解脫門自悟處者卽離覺所覺自覺聖智常現前
也而以無邊等者謂緣無邊法界度無邊衆生得廣
大菩提也二上首說偈中二先彰說儀後明正說今
初焰海是當衆上首仰承佛力爲衆申心十地論云
承佛力者顯無我慢普觀十方示無偏心今觀已衆
通局小異耳然頌總有四種一名阿耨鞞覩婆頌此
不問長行與偈但數字滿三十二卽爲一偈二名伽

陀此云諷頌或各不頌頌不頌長行故或各直頌謂直以偈說法故三名祇夜此云應頌四名唄馱南此云集施頌謂以少言攝集多義施他誦持故今此卽伽陀頌也下皆準之爲何意故經多立頌略有八義一少字攝多義故二諸讚歎者多以偈頌故三爲鈍根重說故四爲後來之徒故五隨意樂故六易受持故七增明前說故八長行未說故今此正唯前二義兼五六二正說中十偈次第各一法門結集取此以爲長行非此頌前也然此中長行與偈有多不同謂偈字則定長行多少不同而長行則約天得法偈中

卽是歎佛此必然也若二文互望或因果之殊或體用有別或互相影略或難易更陳或法喻不同或能所遞舉故傳授者善消息之二文相映於義易了今初天中初二句卽前所遍法界虛空兼明能遍佛身則十身皆遍無窮盡者一出現無盡若高山之出雲二非滅盡法猶虛空之常住次句寂靜也由無性故不可取爲一異俱不俱等後句方便合二爲力此偈是說者自法故不結天名下益準知二中初句是上自在佛爲法王於法自在故次句觀也第三句普也後句結法屬人爲他說故然其結名義同法門恐繁

不配他皆做此三中初句無功用也不思議是標離
分別是釋次句卽不生等相卽生等無卽不義第三
句卽行也長行約要先知法無生方得成無功用偈
則要無分別方能見法無生內證與外用同時所以
二文前後四中初句明廣次句明深卽上智慧海也
第三句自見法實故能令物不迷事理五中初句方
便定也次二句與安樂也六中初句卽前癡闇謂長
迷妄境鎮覆真心也次句卽令觀寂靜次句因滅無
明則得熾然三菩提明是前滅義七中初二句卽善
入無邊境無邊境卽所應處也無有比善也次句無

性者感而應故無依者思念寂故由此能令物不造
業八中初二句卽普徃十方說法次一句卽不動無
依九中初句卽入寂靜境次二句卽普現光明十中
初十一字卽無邊境爲所緣求菩提卽自所悟處次
句旣緣其境必起通化前文略耳第二明第四禪廣
果天長行十法中一普觀等者此應根授法明於不
知根說法無果障中得解脫也斷疑生信是說法果
故謂觀機識病稱根說法藥病無謬故疑除疾愈二
中隨憶念言略有二意一隨念何佛如名應之二隨
念有淺深令見佛有麤妙此於現身得解脫也三中

法性平等者唯一味也無所依者離能所也莊嚴身者證真莊嚴卽非莊嚴故雖現世間還如法性不依諸有此於有依得解脫也四中知世間法者謂眾生世間心法各異知已隨宜現通說法故云安立一念速安非人天外道所能思議以此莊嚴如來教海此於安立教法遲鈍障得解脫也五一毛等者約偈不思議解脫力也無礙有二義一唯就所現則毛中多利自互無礙二雙就能所一毛不大而多利不小一多大小皆無礙也又由無大小相故此於取著障得解脫也六普門者一門攝一切門名爲普門隨一一

門各全收法界故於其中觀察法界深智契達故名爲入此於隨相中得解脫七中眾生無邊根器各異應形說法種種不同旣根熟不休故窮劫長現此於畏苦不化生障得解脫八中觀一切等者謂觀事入理理超情表云不思議此於諸業報得解脫九中法門無邊出者爲要根器萬品故出要難思此於著相得解脫十中種種方便但隨所應終成種智名入佛法以大悲出現皆等雨故此於不欲利生得解脫上云出要令離妄苦今云入法令得真樂也頌中觀已衆內三類天者上五淨居非所被故十偈次第一如

長行初中前二句卽所疑境界境界之言通分齊所
觀普令者觀根爲說故生信解者斷疑也信佛大用
分齊難測故斷佛上疑生其正解信佛所觀之境則
斷法上疑亦生正解謂如有疑云爲存因果非真空
耶爲是空故無因果耶今明只由真空能立因果因
果立故乃是真空也第四句釋一切之言佛以利生
爲意樂故旣該一切故廣大無盡二中初句卽憶念
次二句令見佛三中初句卽法性平等無依次二句
卽莊嚴身謂如法性爲嚴故無依處四中初一句卽
了一切世間次二句卽一念安立不思議莊嚴海五

中初二句卽毛孔現刹上云不思議佛刹但以橫多
今云過去乃豎窮前際皆示現者如鏡現像次一句
是無障礙令應度者見卽佛神通依佛鏡智而觀乃
法性恒爾六中初二句卽普門次一句卽法界末句
義兼於入七中初二句卽爲一切衆生種種出現次
句卽無邊劫常現前謂約機隱顯佛無去來故常現
也八中初句卽觀一切世間也次二句卽入不思議
法也若約理論深是深非甚今不壞事而卽理故曰
甚深全攬理以成事名爲幽奧處兼上二法常寂然
釋上義也以諸法卽寂故不可以理事思也九中初

二句示一切衆生次一句顯出要法十中初二句卽觀應化衆生次句令入佛法第三明三禪長行十法第一門卽寂普現名爲方便說卽是道由說入佛解脫海故此於體用有礙得解脫也又方便言亦通入解脫之方便也第二門隨一切等者謂不能普現得解脫也光影之言略有二釋一謂因光發影影但似質而不似光依智現形形隨衆樂不隨自智隨樂卽應名普示現二水中之月亦名光影謂佛月不來影現心水影多似月少似於水謂水動則流光蕩漾水濁則似晦魄臨池若止而且清則圓璧皎皎此亦隨

自他意也此就天王且隨天衆所樂偈就於佛無不應也第三門佛境界有二一如如法性是佛證境二十方國土是佛化境嚴淨亦二離相息妄則嚴如境萬行廻向則嚴化境此二無礙大方便也此於無巧莊嚴得解脫也第四隨諸等者謂大悲深厚故隨入生死衆生無邊故永流轉而示導也此於無大悲捨衆生障得解脫也第五門佛調衆生或折或攝或兼二行雖悲願多門皆令趣無上道若憶念此居然受化不滯於權此於勝所緣有忘念障得解脫也第六得普門等者佛以稱法性之總持包攝一切總持故

云普門復能流演無盡故得稱海此於聞思有忘失障得解脫也第七門謂佛出難值引之令值信心難生勸之令生信含衆德所以名藏下經云信爲寶藏第一財故此於嫉妬邪見障得解脫也第八能令等者上令信佛此令信法仰依卽信領解便喜信可趣入喜則奉行因得解脫名而出離此於迷覆衆生障出離道得解脫也第九門謂衆生界法界調伏界虛空界皆無邊無盡菩薩悲智以方便界開示法界行調伏界等虛空界於有限礙障中得解脫故第十觀衆生等者由悲故憐愍由智故觀察觀察煩惱知病

行已化而度之此於無悲無方便障得解脫也頌中十一頌初十次第如前長行依梵本列名中此長行闕第十一天彼名星宿音妙莊嚴天王下言妙音者略而未廻第一頌中初二句是了達方便依法性而現故後二句說卽是道說不思議解脫令衆同歸二中初二句明光影普現無依故如影第三句成上二義以無生故如影無依略不明隨天所樂三中初句標方便無量劫修兼顯大義次二句正明方便嚴佛境界四中初二句卽衆生永流轉謂無明所盲覆本淨心造業受身故恒居生死次句卽隨而示之五中

總相頌佛調生行初句高次句深後句廣六中初二句卽普門陀羅尼次一句卽所流出示教者示其善惡教使修行稱性無偏故遍而無盡七中初二句值佛次句生信藏不信則佛難值正信唯佛能生旣值佛生信反覆相成今之一遇何得不信八中初二句卽所聞之法以無性爲法之真性次句卽令衆生信喜出離淨則出不信濁成無漏故九中初句能調伏人前因此果耳化衆生界卽調伏行無邊無盡爲不思議思惟悅生是名爲入十中初二句卽衆生無量煩惱謂利鈍二使愛見羅刹皆甚可怖也次一句以

悲愍之以智令離十一中旣闕長行對名略顯初二句星宿莊嚴義也謂佛光流於法界聚若星羅次句卽妙音莊嚴化衆生事不出三輪上云妙音舉一立稱耳若長行立名應云得放光現佛三輪攝化解脫門第四二禪長行十法初中二義一內證真樂經論共說樂有五種謂一因二果三苦對除四斷受五無惱害無惱害樂更有四種謂出家遠離樂禪定適悅樂菩提覺法樂涅槃寂靜樂今當第四若通取受字兼禪定菩提則合因果言恒受者以無所受受諸受故若待境界卽非恒也二而能降下外建大義降神

現相除苦因果此於涅槃體用障得解脫也第二門
謂無緣大悲與性海相應拔世憂患故出生喜樂無
盡名藏此於惱害心得解脫三一念等者修福德因
感依正果福之力也雖多人多劫所感念劫融之頓
現此於時劫得解脫也第四門謂以佛力不動成住
壞三皆如空劫常清淨也此於遷變得解脫也五愛
樂等者謂信樂佛菩薩法敬奉修行則二障得解脫
也第六門地謂地智義謂證淨卽離念超心地也方
便者教導及入地之由入住出等也以無盡辯演無
盡法故能經劫七一切等者通有二義一現多身與

多供供多佛皆稱真故名大方便卽長行意二一念
八相遍法界故名大方便卽偈中意於上自在名爲
解脫八於定慧障得解脫九果滿應機是於現身化
生無堪任性得解脫十見佛大願雲愛樂隨學此於
自輕障得解脫二頌中十偈次第依前今初前三句
明寂靜樂通舉因樂以顯果樂後句降現之用二中
初句卽所相應海次句卽能應大悲大悲荷物故名
爲地次句卽生喜藏憂除故喜患除故樂三中初句
能現次二所現四中初二句卽普使成住等次一句
頌如虛空清淨以三災彌綸而淨土不毀故然三四

二偈似如前却且順文釋耳五中初二句咸敬奉是
愛樂餘是聖人次一句卽上法及信受也六中初句
經劫住次二句卽地義方便無邊是一切也七中通
頌八相普周略無供養八中初句是前智慧次句神
通次句無盡及海以隨根令淨是深廣故九中初二
句卽德海滿足次句出現世間十中三句通明前昔
誓願力第四句結中便顯深信愛樂藏以文云大歡
喜故第五初禪長行十法中一普住等者大用應機
故普遍說法用而常寂故行淨無染得心無行故行
淨了境無相故無染二佛爲定境住定則所見深故

三普入等者法海難量名不思議一言演盡名爲普
入四圓音隨類名音聲海要無分別方入佛聲五能
憶等者化生卽是趣菩提行故以宿住智明記六衆
生報異隨業有差佛示現受令生正信七於法自在
方能隨類調生八佛身無相等法性之清淨現而同
化爲寂滅之行矣九不著諸有故能常現三業無邊
更無可依十觀性無相猶如虛空何有可盡察用隨
宜如擊水文隨擊隨生復何可盡偈中先上首觀衆
開成四天合則梵身卽衆亦有經云梵衆梵身梵輔
梵眷屬身卽是衆輔卽眷屬十偈初中初句法身普

攝述
大方廣華嚴經疏
卷之
遍道場次句智光說法次句行淨無染境相智行既
亡則大用影像亦寂後句通以喻顯雲不離空空不
礙雲以況寂用二中初二句入禪之境如來法身卽
是心性若能觀之爲上定故次句示入方便雖多同
入一寂三中初句卽不思議法次二句明普入義以
一言說盡故一言說盡之辯劫海亦不能窮顯法無
盡也約能包則一言說盡約能久則劫海莫窮然一
言但說剎塵未是無盡設欲一言盡者則二三兩句
相違一言說盡劫海更何所演而得無窮更有所演
前則不盡又不可重說若欲通者總望則可說盡隱

映重重則不可盡如擊水文小擊大擊遍擊各隨文
生盡未來際擊盡未來文生爲難思法也四中圓音
之義文略有三義一廣無邊二別詮表三無分別如
次三句餘如出現品辯五中初二句卽教化衆生方
便行三世諸佛皆以利他爲向菩提自清淨業故次
句前就梵王故云憶念今據如來故身現耳一毛尚
現何況全身六中初句業相差別次句報相差別次
句現同世間七中前二句卽隨類調生調法自在故
能隨類廣遍次句顯明前義無思成事故八中初二
句明佛體性卽前清淨寂滅不可盡下略顯四義如

空次句佛用應現爲行既皆如化不失寂滅九中初二句所現無有邊次句勤現無依著十中初二句常思大用無盡謂安住大悲宮能現大事故次句常觀法體無盡自下第二欲界諸天文有七段第一他化天王長行十法中一謂現衆生前自在調伏使其成熟化法無盡故名爲藏二觀世樂相皆苦故應捨觀世樂性卽入聖樂三隨樂斷疑令起正行四一言普攝諸義遍於時處爲物而說五做佛修慈六示現等者大悲十力摧彼慢高而無摧心故云示現七以智慧光照諸世間令離三毒之闇則無惡趣之果墮癡

障重故與偈互陳八十方等者爲念佛三昧純熟故隨念何佛卽能得見如休捨解脫等九應念現成十普入等者寂用自在現世調生總名威力偈中亦十初中初句體遍次句用周故能現前次句教藏能成後句所成自在開於法藏悟深法門卽成熟也二中初二句二樂次句令入三四可知五中三句共顯如來大慈初二句舉劣顯勝次句以喻正顯謂世慈有相若須彌之高大海之廣終可傾盡佛慈稱性若芥子之空投刃之地卽不可盡又如空有普覆常攝廣容無礙難壞無盡略舉一無盡耳六七與八文亦可

知九中初二句明佛體普遍無成不成次句隨衆生
心現成正覺十中普現十方卽普入一切世間餘皆
威力自在第二化樂天長行十一法中一爲物開示
諸業如化化雖體虛而有作用爲力業亦從緣無性
而報不亡二捨離等者攀取緣慮是惑病之本若心
境無得則捨攀緣三闍滅智生如月盈缺四示現等
者梵聲微妙故云悅意應遍十方故云無邊五知一
切等者此有三義一福德之相有十蓮華藏世界微
塵數故無有盡二謂清淨慈門等無限因所生故一
一因果皆稱真故一一卽無有盡皆同虛空三大慈

悲行是福德相使盲聾視聽等皆慈善根力故涅槃
經中有聞讚佛爲大福德怒云生經七日母便命終
豈謂大福德相讚者云年志俱盛而不卒暴打之不
瞋罵之不報是故我言大福德相怒者聞而心伏故
慈爲無盡福相然與前義相成六三達圓智了三世
劫此就天王且言宿住耳七開悟等者此門闕偈上
下文中屢有開悟卽同法華開示悟入以開攝示以
悟攝入謂開示約能化悟入約所化彼論云開者無
上義謂除一切智智更無餘事卽雙開菩提涅槃謂
以知見之性爲涅槃知見之相爲菩提衆生本有障

翳不現佛爲開除則本智顯故示者同義三乘同法
身故悟者不知義不知唯一實事故今令知成報身
菩提故入者令證不退轉地故卽是因義爲證初地
已上爲菩提涅槃因故廣如彼釋八稱性之光有何
難遍九一切等者謂契理具修長劫無倦故衆魔外
道所不能摧十善惡等殊苦樂等異皆知性相十一
示現等者無邊品類一毛頓現更無來去尤顯難思
偈中脫於第七唯有十偈初中初句總次句開示後
二句顯如化力差別業者果不亡故二中初句所攀
緣後二無得然緣境有二一真二妄真佛有緣亦成

妄惑況於妄耶種種觀者五求不得故謂佛有耶常
見爲惑謂佛無耶邪見深厚四句百非所不能加故
無所有非唯一佛十方亦然應化示現非真實故求
實無得卽見真身真卽無緣佛尚應捨何況餘境三
四可知五中初二句福德相次句無盡相相好者經
云盡人中福不及一天乃至云盡世間福不及如來
一相等六中約天之智普知約佛一毛能現七中初
二句明毛孔過空謂靈智證理非如虛空真理超事
故亦非比無限理智不可分析隨其少分卽融攝重
重故一毛之量便越虛空次句別示越相謂毛孔不

大而無涯卽廣陲無礙故杜絕思議之境前卽一光
外展今卽一毛內廣文綺互耳一毛本自遍空十方
豈得難滿八中初句長時修次句無餘修次句無間
修具此三修故進力難壞而言廣大波羅蜜者至第
五經釋九中初句總顯業之性相卽緣生果報之不
亡便是無性之非有故不可有無思也次句佛如是
說天如是知次句以法性示業性十中初二句小一
現大多爲一難思次句現時不來不現不去又難思
也第三知足天長行十法中第一天得總相法門諸
佛將興皆生彼天下生之時普應法界頓闡華嚴爲

圓滿法二盡虛空等者光明色身皆遍空界了不可
取故云清淨三以淨願力滅惑業苦四五可知六普
化等者普卽無偏常卽無間示其真樂卽如來藏七
自覺智境佛已入之故示物同悟八以淨福堅菩提
心九謂仰觀下化十卽照現迅疾也偈中初偈前半
卽出世義上句體智俱遍下句悲用皆普後半卽圓
滿教輪前句卽實之權爲妙門後句會權入實爲圓
滿二中可知三中初二句以行淨願次句雜染本空
故前令滅佛法本具故今令滿妄盡真顯二言相成
四中初二句依體普現若月入百川尋影之月月體

不分卽體之作用彌法界體用交徹故不思議次句稱根說法五中前半卽所淨之衆生具三雜染故於中上句標下句略示惑相慢是根本僣逸隨惑僣謂染自盛事慢謂恃已陵他放逸卽是縱蕩僣謂染法所依慢能長淪生死放逸衆惑之本故偏舉此三蕩者動也謂境風鼓擊飄蕩馳散次句能淨法門謂不取於相當體寂故六七及八文並可知九中通顯上旣親近必當敬養聞法以聞調他爲真供養列名中云星宿幢今故莊嚴與長行互出十中前半所知衆生心上句標深廣下句顯相念慮不住多於草故廣

也深者有三義一恒轉如流故不住二本體寂然故不動三從緣妄起無別所依次句卽一念悉知第四時分天十法一善根若發憂惱自除二以無限方便普證法身之境三悲摧惑苦故名爲輪四以三達智知機授法五陀羅尼等者總持入理故名爲門以慧爲體故云光明若取助伴則兼念定念卽明記故能憶持定乃心一常無忘失四無礙等一切諸法皆是所持六可知七轉法等者轉法示菩提之道卽是成熟衆生之方便八十眼圓見隨宜往調九超出等者超出業障使離惡因不隨魔作捨惡緣也十等雨法

兩誘令進善使彼受行誨令斷惡得心清淨此就於
天偈通一切偈中亦十初偈通顯前半彰已已離後
半開發能離善根二三四五文並可知六中初句卽
業性言廣大者一念造一切故無窮盡者未得對治
無能止故有多門故次句善入智了自入開示令他
入次句入門多種七八亦可知九中初句見佛爲緣
次二見佛二益一正智生必內超業障二佛爲真導
豈外逐魔緣既不隨魔安造魔業十魔並離故致諸
言十亦可知第五三十三天衆長行有十一法初中
承力故憶念念過去佛者曾入此天故三世有二一

亦念未來二過去自互相望亦有三世生大喜者境
殊勝故慶自福故二能令等者然佛身無染淨大小
亦無勝劣猶若虛空雲屯卽闇日朗卽明色昏卽劣
物隔言小今妄雲盡而智光照故清淨性空現故廣
大妙色顯故無比皆解脫力故曰能令三大慈不揀
怨親若雲無心而普覆四恒見等者人天世主多恃
威德故佛現超之令其敬喜五知其因果差別使物
勤修因果金得名福六開示等者示佛調生令菩薩
做習七初成後壞住時轉變乃至毛孔細利皆悉知
之言轉變者福人出世則琳琅現矣薄福者出則荆

棘生焉八憶念等者佛毛現因調行天憶則能思齊
九一切諸樂以佛爲因具勝德故就樂增勝說諸天
耳十開示等者受生善根卽念佛力開示令不迷惑
則去放逸而進修十一疑自疑他疑理疑事有多種
種如聞空疑斷聞有疑常聞雙是則疑其兩分聞雙
非疑無所據又聞空疑有聞有疑空等互相疑也今
開之使悟偈中亦有十一初中云平等者化儀同故
又但以世俗文字數故說有三世非謂如來有去來
今二中初句廣大次句無比次句清淨然古德明通
有六義一廣謂總法界爲身故二遍全遍一塵至十

方故三妙色卽無色無色之色故四勝無有比故五
益利物無涯故六用光破闇故三中前半卽慈雲上
句果大下句因深一切佛法依慈悲慈悲又依方便
立俱稱深廣故致海言次句卽普覆也次後六偈文
並可知十中初二句卽前善根少功德者以少況多
彰因爲勝次句卽人天受生故離三惡怖十一中初
句卽能開之法是寂滅智通次二句由普應故疑皆
斷也第六日天長行十一法旣爲日天多辯光益初
一名及法門皆是總也謂佛身智光猶如彼日無私
而照是曰淨光此光體也次辯光用略有四義一約

心高下齊明故名普照二約處則窮十方界三約時盡於未來四約功用常無間斷如斯利益卽大智之功二以一切等者衆生本有佛智如海潛流今佛以隨彼彼類身設種種方便務在開悟令其證入三衆生愛染漂泊無依佛德無礙應爲其主隨修絕染名淨功德一行契理卽曰無邊況其具修耶四修一切等者以智導悲爲物受苦故深歡喜五謂體離障惑用而遂通故云無礙若身若智俱得稱光周而不偏故云普照身心明利是益精爽爽明也大集經云國王護法增長三種精氣一地精氣謂五穀豐熟二衆

生精氣謂形貌端嚴無諸疾疫三善法精氣謂修施戒信等今文正在第三益其福智義兼前二法力遠資故六淨光等者身智二光淨物身心信解深廣于何不喜七晝則勤心修善業故八大悲海等者謂無緣大悲坐於道樹出多奇寶故色相寶者應言寶色相圓明可貴故以寶爲體寶莊嚴故具十蓮華藏故云種種一一色相用周法界各現無邊境如是皆從大悲海流悲海包納不揀賢愚故九慧除癡翳法眼則淨淨見法界法界卽藏藏如前說十發生等者謂於佛所發生清淨心會一供養能令其福續至菩

提故如出現品食金剛喻況相續耶十一使物居業
莫越日光令人進德寧過法義偈中亦有十一初中
前半淨光普照後半常爲利益滅惡生善破愚爲智
等爲多方便二三可知四中前半卽一切苦行此有
四難一背已利世難二行相唯苦難三處經諸有難
四時劫無量難於此具行故云一切次句明深心歡
喜亦有四義一爲物苦行滿本願故義在初句二智
照苦性本空寂故卽光明照空三遍淨無染非雜毒
故卽遍淨如空四自他有果非無利故卽第三句全
五六可知光網之義如賢首品七中通明舉劣顯勝

以辯難思故能成辨諸妙功德言世不及者世雖多
光益非究竟佛光雖少必徹真源不可盡故以一況
諸八九與十文亦可知十一中初句卽能照法門猶
一日宮千光盃照隨舉一法有無量門然有二義一
約相類如一無常門有生老病死聚散合離得失成
壞三災四相外器內身剎那一期生滅轉變染淨隱
顯皆無常門餘亦如是二就性融不可盡也次二句
普運照義一日周天則日日無盡一門歷事則劫劫
難窮方便多門終歸一極廣者無邊大者無上第七
月天長行十法初名法亦總謂光有身智二殊法界

亦事理兩別事卽機之身心及所依刹身光照身令
覺照刹令淨智光照心破癡照理令顯身智二光相
卽則所照四法亦融以之稱普金除惑障俱得淨
二觀察等者悲心普觀授以多法令入無邊法界三
衆生藏識皆名心海前七轉識名攀緣轉轉謂轉生
亦流轉也緣境非一立種種名故經云藏識海常住
境界風所動種種諸識浪騰躍而轉生喻云洪波鼓
溟渤無有斷絕期旣知機殊隨應授法四與一切衆
生等者謂示物聖樂令得初地此樂本有染而不染
爲不思議五謂以菩提心爲家二利爲作業益以身

口爲牛利智爲犁耕於心地下開熏種生信解芽起
正行莖開諸覺華獲菩提果自利則以不放逸隨時
守護利他則以能化大願守護不令魔惑禽獸侵犯
從因至果得成就也六慈悲等者謂慈護現樂悲救
其苦令見因果斷惡修善名真救護七以佛智風持
大悲月使明見正覺離苦清涼八開示等者一切法
有二種一是所迷謂緣起不實故如幻緣成故無性
二是能迷謂遍計無物故如空妄計故無相又緣起
法有二義一無相如空則蕩盡無所有是相空也二
無自性如幻則業果恒不失卽性空也此二不二爲

撰述
一緣起是故兩喻共顯一法既不迷能所則悟真如
成正智火九悲願爲物現相好形是大業也十普斷
等者毛光普演何疑不斷偈中亦十初二可知三中
初句卽心海攀緣轉若以生滅八識卽彼第八亦名
爲轉以恒轉故云念念殊恒故非斷轉故非常新新
而生念念而滅念念殊故體恒不卽彼如來藏功德
常具義亦不離如彼瀑流離水無流離流無水又如
海波濤有漂溺故多畜養故法合思之次句明了知
謂此識深細唯佛智知故次句示心海性卽是佛智
不令外求稱機故喜四中初二句明失聖樂聖安樂

者卽聖智涅槃本有今無故沉迷妄苦次句明與示
其性有樂非苦外名不思議見性得樂性卽是門五
中但是法說如來卽田主也悲佃物田爲利入有是
所作業爲利同於求果入有似於耕犁說法卽是下
種勸善正當守護令熟可知六中前悲救護語其本
心此明智光彰其所用悲智相導能真救也七中初
句佛爲福依月爲涼本次句應言大風持宮而今云
爾卽是轉喻大地如佛宮室如福次句卽照現義亦
清涼義八中可知九中初句佛如虛空大業性也次
句大業體也不利衆生非大業故次句大業相依光

撰述

大方廣佛華嚴經疏卷第六

五

用六

有影可以知動靜依鏡有像可以辯妍媸然彼影像無自性相如來相好當知亦爾十亦可知天衆竟

大方廣佛華嚴經疏卷第六

音釋

妍媸 妍倪堅切美也媸充之切醜也 鸞 盧官切壘委勇切 嗚 烏沒切

與 於到切 蕩 蕩徒浪切 湊 湊徒浪切 亮 亮徒浪切 卒暴 卒蒼沒切

卒暴 卒暴沒切 湊 湊徒浪切 亮 亮徒浪切 卒暴 卒蒼沒切

急也 湊徒浪切 湊 湊徒浪切 亮 亮徒浪切 卒暴 卒蒼沒切

先嚴 賀學禮遺願施贊刻此 計字一萬一千

海虞 第子契慧 淨住 沙彌契机同對

大方廣佛華嚴經疏卷第七

唐清涼山大華嚴寺沙門澄觀撰

初一入自下第二有八段明八部四王衆初四段皆

初一是天義如前釋今初乾闥婆王長行十法初一

卽東方天王謂攝受折伏逆順多端善巧應機故名

自在二普見等者謂令衆生見佛一切功德嚴佛一

毛而爲利益一一皆爾故云普見三以慈愍方便除

憂則喜生憂苦既如海廣深喜樂亦難盡名藏然則

世之憂喜生乎利害利害存乎情僞苦樂存乎吉凶

吉凶存乎愛惡愛惡盡則吉凶苦樂皆亡情僞息則

支那

大方廣佛華嚴經疏卷第七

一

用七

利害憂喜永斷如此方爲永斷憂苦喜樂生焉四永斷等者謂得決定智光則邪惑永斷五謂慈雲普蔭材與不材皆涼慧澤廣霑三草二木咸發六現廣等者現身益物也稱性普應故廣大具相清淨故妙好七佛出說法是大名稱佛法衆僧俱稱爲寶令此遠聞義云普散八現一切等者身光普照塵不能染見者必歡智光悅機惑累不生又歡喜也故云大喜九法水遍滋菩提實行行旣樹立見者必歡無復二乘一切皆菩提樹也十善入等者一多無礙名爲佛境天王智達故云善入偈中亦十前五可知六中初句

現身次二句一切獲安樂也世間卽一切也無盡樂總顯也謂佛現於世足履影覆若在人天現增快樂若在下苦七日之中身心安樂乃至終獲涅槃之樂故云無盡次句別示出世因果之樂先因後果先世後出世皆次第義又總取偈意佛身清淨是解脫因生無盡樂是解脫果世無盡樂又解脫因能現淨身又解脫果又佛身清淨是樂見因樂見卽爲清淨身果衆生樂見是安樂因無盡安樂是樂見果無盡安樂是淨身因能現淨業是無盡果如是展轉因果名次第成七中初二句實所濟機堅謂難壞密謂無隙

間無空處智不得生次句正散寶也八中結句應云
普放寶光如是見而云妙音譯者之誤妙音屬前師
子幢故九中初二句法水普滋次句道樹普榮也又
方便多門是開權也入菩提行是顯實也種種方便
但爲一乘是普滋也十中初二句佛境也次句安樂
也佛力能現無所動者遮妄見也非促多劫就一刹
那非展刹那受於多劫本相如故名無所動隨應度
者佛力令見第二鳩槃荼王長行十法中初卽南方
天王謂內惑外讐皆名怨害安住忍力能伏之二
修習等者二利之行趣果曰門深廣難窮名無邊海

三知其現欲如應化伏四普成就等者鈍識者現之
以通利智者示之以法遍世多劫名普成就兼如虛
空故云清淨俱能照世卽是光明三輪化生是所作
業五世間惑苦可畏不安菩提涅槃安隱無畏萬行
爲其因道則無畏滅果成矣六消竭等者愛欲漂流
深廣如海智日赫照則妄竭真明七謂於諸趣普現
身雲耀通明等之電光也八普放等者身智光明遣
除二障九多劫修悲究竟滅苦爲不退轉悲多方便
故復名藏爲安衆生所以開示十普現等者稱性神
通無來去而流轉偈中初偈通顯明佛已滅怨怨之

大者莫越憍慢有之則卑陋滅之則端嚴次四偈可知六中初句欲海欲爲苦本云具衆苦次二句消竭旣欲惡止當說善行七中初句普現身雲次句明等電光故云種種次句兼明雷雨雷有二義一遠震二發生謂蟄蟲發動草木發萌圓音之雷可以思準餘三可知第三龍王衆準偈及梵本皆有十一長行脫第五但有十法初一卽西方天王法門及第二如偈當釋三與偈文通有六義一諸趣是化處二淨音是化具三佛名是化法四神通是化本五衆生是化機六隨樂是化意四普現等者謂一毛普現無邊依正

以毛稱性能廣容故廣容卽是普遍故能現之佛還自住於毛孔所現剎中能所無雜依正區分大小宛然名建立差別五靜法云準梵本有焰龍王得一切衆生瞋癡蓋纏如來慈愍令除滅解脫門謂大慈居懷則三毒俱滅六開示等者佛大慈悲是福德海二資糧滿然後得故衆生慈福卽是百川佛毛示現以表同體旣知同體自然朝宗因示悟入故得大喜樂七慈音智俱故云清淨淨無貪愛何畏何憂八示現等者謂於身中現身土也九觀佛昔行深廣故愛樂歡喜海言通二謂歡喜供養十示現等者謂爲衆演

音故云示現音有四義一類多謂一切二普遍謂平等三稱根清雅故云悅意四一音隨類故云無礙無礙卽方便也十一謂此無熱龍住清涼池出香美水流注四海導引百川時布慈雲降澍甘澤是故能滅諸世間苦偈有十一初中諸龍有四熱惱名熾然苦今金有治一金翅所食苦苦初句爲治以觀佛法同三歸故二行欲時復本身苦三鱗甲細蟲苦金第二句爲治學佛等利故四熱砂著身苦後二句爲治以不堪蟲瘞熱砂中騷今大悲哀愍故能治之有說四苦無鱗甲細蟲而有風吹寶衣露身之苦亦以第二句

治之就龍且說龍起末句約佛通拔畏塗二中此就佛論示現前約龍云能轉又前一念時促今一毛處小二文影略餘九可知但第五偈卽前所脫第四夜又王衆長行十法初一卽北方天王得以無邊等者謂善者自樂不待加哀惡者必苦心則偏重巧救多門故云無邊又此天能伏惡鬼令不犯衆生是救護也二普觀悲救苦護善不滯空有故云方便三惡業障重名甚羸惡又羸無善力謂一闡提惡卽弊惡謗方等者明示妙理是謂資益四做佛歎佛得名聞果五悲智二照合爲一心與法身俱故恒觀察六妙

音說法利益多端唯應度者聲豎能益七教廣理深
一句能演卽是普入八令物離邪則能住正爲守護
矣然住正道者則不分別是邪是正云不思議九集
福德因受快樂果由身智光得增長也十念佛修因
生十力果天未證極故云隨順偈中亦十文顯可知
第五摩睺羅伽衆十法一普現威光名爲神通不動
性淨示涅槃因故云方便依因集德必得無依涅槃
二除惑契寂是清淨因清涼悅樂是涅槃果三善者
善之不善者佛亦善之善不善覺亦亡乃入本淨四
福非福相深不可著非福現福名自在相佛佛無二

是平等相五無智黑因如燈開示怖畏苦果如幢爲
歸六以知佛德同空齊已一性故歡喜也七見理決
斷聞深不怖聞淺不疑聞非深非淺意而有勇八風
不傾爲勇猛力旣以自正必能正他爲救護主八往
修喜因故見念皆喜九見理智成則緣不動智爲行
本諸度悉圓亦猶海納百川更不流矣十開生等理
示佛等應破情不等令悟性等爲平等道十偈如次
文顯可知第六緊那羅王十法一世喜樂業皆因佛
生二聞深適神故法喜無上終得涅槃無盡安樂三
佛德深廣信亦包含四音演真法令聞故妄憂除而

意悅五達境唯心而本空則安立衆生於覺悟六難
遇益生所以示現相嚴常住名爲妙色七大智普慈
是二嚴果一切智因是能生業八業細難窮自觀示
物九神通益物無間稱恒十知機巧化謂攝心正智
御心如境十頌次第文並可知第七迦樓羅王依賢
首靜法皆云準頌長行脫第五執持王一智無著故
見無礙悲普觀故通悉調二遍坐覺樹名住法界現
通說法名爲教化三進策諸度往修故成四境界如
偈文難思則入方爲勇猛五諸本多脫遇一本有文
云大海處攝持力迦樓羅王得能竭衆生煩惱海解

脫門多是古疏本脫今依有本然偈約能竭說佛福
智六衆生無邊故成就智多七城有三義一防外敵
二養人衆三開門引攝今言法城通教理行果行契
理教則無不俱嚴故各有三義謂了心城之性空則
衆惑不入見恒沙性德則萬行爰增道無不通則自
他引攝便能契果絕百非以成解脫養衆德以全法
身開般若而無不通矣方顯教城無非養所詮旨句
句通神有斯多義故偈云廣大匠窮重重四門故無
數量究竟能闡唯我世尊八法身無相故不可壞體
卽真如凡聖平等無分別智安住證會名成就力九

現同類形方便調伏十衆生歿生皆由行業佛生死智方能普入頌文如次配釋可知但第五偈或有前脫故略釋之初二句甚深廣大次句福智相嚴行通因果因深果遠已不思議復有一行是如來行所謂大乘大般涅槃則行爲果果皆絕言道佛行如出現品第八阿修羅王十法一修羅尊勝等須彌之高如來威光蔽十方大衆衆生各見真勝主也二彼能以一緣作種種事今一剎那現於多劫調生等事三以多法門入佛境界則苦滅心淨種種法門亦如幻也下云苦末羅卽巧幻梵音四多劫多苦爲物非已如

尸毗救鵞薩埵投崖已是丈夫最勝嚴飾況終剋寂智萬德以嚴翻顯無利勤苦誠爲可醜旣爲物而行故有大眷屬五以大幻通力動刹悟機不怖衆生斯爲大力大力婆稚華梵異耳六開種種權門安衆生於一極之樂權爲入大之本故皆佛智因權實不迷斯爲遍照七萬善順理普不可壞斯解脫處何染不亡功歸正覺故偈云佛力如是修者堅固妙嚴八悲用智故普令無疑主斯事者廣大因慧九供事修善有勝德故十普入諸趣明處無不遍偈云三世時無不均同有佛性名爲決定具上三義平等行焉不宣

實義非善音也此上一段及後夜神皆結歸名上下
例然恐繁不釋頌文如次可知自下第三諸神衆有
十九衆今初主晝神十法一智了物心如空入色光
照身器如日合空身遍器中如像在鏡世間主力能
攝此身此身之性等世間故皆入觀機故名普入所
入之處卽爲宮殿二義圓稱機故滿心成益三身法
二光皆可愛樂四法雨潤種已合實者解開善未芽
者信發五無法不悟名普明力曠劫修集成智莊嚴
六方便開示世樂亦苦令其悟入見理法樂如歡喜
地也七如來身雲就體則非有無約機則差別遍於

十方不可謂之無約佛則稱真法界不可謂之有此
則隨緣非有之法身恒不異事而顯現以化寂滅非
無之衆生恒不異真而成立卽無差別之差別也八
處危者護之令安有苦者救之令樂九衆生闡於多
欲故沉淪長夜以法開曉喜足爲先喜足智俱是功
德力能令離苦得安樂故十有覺德行故名普聞
旣福廣名高故不虛其益偈文可知第二主夜神十
法初七夜神是善財十地善友見解深廣彌顯衆海
法門難思一普德淨光卽善財離垢地善友彼名全
同法門名寂靜禪定樂普游步普游步言卽大勇健

也寂靜禪定樂卽是定體現法樂住故名爲樂大勇
健者卽是定用健則堪能勇則無畏謂見佛淨機游
戲神通故名勇健亦游步也勇健廣大故稱普德無
惑智俱可謂淨光二卽發光地善友彼名喜目觀察
衆生解脫名大勢力普喜幢謂此解脫德無不備化
無不周名大勢力卽今廣大身惑俱淨無不樂見故
云普喜悲爲德相卽幢義也觀察普喜名爲喜目三
卽焰慧地善友彼名普救衆生妙德護世精氣方是
救生由護生故顯德之妙也法門全同次第又當謂
感必現前調令清淨故四卽難勝地善友彼名寂靜

音海法門名念念出生廣大喜莊嚴念念出生卽積
集義見佛利生故生大喜莊嚴二義一見佛修歡喜
因嚴樂見果故二積集此喜神自莊嚴由定發音名
寂靜音深廣如海五卽現前地善友彼云守護一切
城增長威力偈云尸利以梵音合於二義一云吉祥
二翻爲守故下譯跋陀室利以爲賢首又以首字音
同義別彼爲頭首法界品中乃爲守護皆譯者方言
少融耳若以義會增長威力卽是普現吉祥正當次
第法門又同彼云甚深自在妙音解脫妙音故悅意
悅則意淨卽寂能演故名自在六卽遠行地善友彼

云開敷一切樹華一切開敷卽普發也法門彼云菩薩出生廣大喜光明文少倒略耳舊經云菩薩無量歡喜知足光明知足滿足文相近也謂能知如來巧智示法大福威光故曰光明佛以福智滿足物心則含喜名藏七卽不動地善友彼名大願精進力救護一切衆生法門名教化衆生令生善根教化開悟文異義同令生成熟始終異耳謂現通示相皆爲調化一切善根皆令生長平等護育卽救護一切精進大願故能爲之今文略耳八念念久修恒遍救護是無邊慈也此與善財歡喜地善友似同而文多異又非

其次故但直釋九於三毒難壞衆生以大悲門現莊嚴身故石室留影毒龍韋心況現身耶十本爲衆生故成自德令他樂滿偈中十偈如次初中初句解脫之力能觀次句卽寂靜樂神以此定觀佛此體故下經云普見三世佛而無取著以知如來無相性相本空故故云寂靜虛空相也次句卽大勇健準下經則自他兼淨也次句定果也上約佛說若約天說卽四句皆是定用以住此解脫能見佛體用因果故二三可知四中稱理遍喜爲廣大無邊縱內心不搖而外現威怒更深難測五以寂故能遍六以衆生本來自

盡故是寂滅是以智窮妄末理無不顯妄徹真源惑無不盡喜方滿足餘四可知第三主方神十法一現身說法令悟得果皆救護力二神通示相是能成辦業衆生出苦是所成辦業三法光破闇斷斷智生智與法喜俱生斷以寂滅爲樂四昔現說法聞必惑滅故不唐勞五聖人無名隨物立名貴在生德及滅惑耳六七可知八業同性空並不失報俱無差異性相無礙爲自在力說能感報令除惡業說業性空善業亦亡九前約說業性相令物絕業此約知業差別擬隨機化十世人靡不有初鮮克有終今聖人有志有

能故所作究竟世人以人隨欲不能兼亡今有慈有愍故令物喜謂十波羅蜜無不究竟四無量心令物歡喜頌中次第配釋可知第四主空神長行十法一智慧造理則十眼廣照日月合空則萬像歷然二身智二光遍入法界三佛身如空是無邊境無生無染爲吉祥風四廣說聖道則離三障安住二空五上求下化名廣大行爲安衆生如妙髻焉六沉生死之厄難悲智光以濟之七不礙福智相導是謂勝力八惑由智遣九妙音善說十不壞本處而稱周十方偈中十頌如次三中空有四義含於五法一離能取生卽

一撰述
大摩訶般若波羅蜜經卷第七
三
絕妄想二離所取相無相無名三境無自性卽是如
如四心無所得是爲正智迷如以成名相妄想是生
悟名相之本如執翻成智如外無智智體卽如此二
猶空寂照無礙如斯見佛是曰吉祥四中長行及列
僉名安住今云圓光圓光表智安住表定二事相資
前後互舉僉能滅障於理無違六中生死海者瑜伽
七十二云五法相似生死得大海名一處無邊相似故
二甚深故三難度故四不可飲故五大寶所依故釋
曰由前四義衆生流轉由第五義菩薩入之且約分
喻第九十云由三相故不同水海一自性不同分謂

水海唯色一分二淪沒不同唯人畜故唯沒身故三
超度不同未離欲者亦能度故生死海反上可思餘
七偈可知第五主風神十法一以方便風合智日光
智入深法而無障礙身入世間而無影像二菩薩以
求菩提之大心持稱真之供具等虛空之廣大不礙
事之繁多而以全法之身一念供無邊之佛如彼風
力無不成也三長風忽來浮雲散滅慈風忽起惑苦
病亡四福智莊嚴之風摧壞如山之障五十力降魔
十軍皆殄獨名竭水者欲愛爲初故六毛孔慈音滅
除五怖若百竅異吹遍吼悅機七智入實相故妙辯

如海如風擊樹故能下垂八調生方便爲智所入故名爲藏九禪定宮殿必定慧雙游故能滅癡闇約佛則動寂無二見必滅癡十日月明照非風不運智行無礙方便力焉十偈可知已下入第四經第六主火神長行十法有云準梵本此脫第四一以進力現世除物無明以最初故偏從火義二惑有二義一漂二惱善巧迴轉則能息之三稱性之福相惑不動與大悲合自利不動俱能攝德無盡名藏四有云準梵本神名勝上繫光普照法門名普能除煩惱塵謂劫海行滿故今能現通滅惑偈云衆妙宮神同前列名衆妙卽勝

上義耳然諸本多無或有本則具云衆妙宮殿主火神得大慈悲廣陰衆生解脫門恐是傳寫脫漏耳五光明照耀等者日光合空等空無際智符實相稱實無邊雖曠劫修成全同本有窮靈極數妙盡難思實爲惑本卽是正因智照心源卽是了因如空與日今略申十義以辯難思一謂日與空非卽非離二非住非不住三而日善作破闇良緣顯空之要四雖復滅闇顯空空無損益五理實無損事以推之闇蔽永除性乃無增空界所舍萬像皆現六而此虛空性雖清淨若無日光則有闇起七非以虛空空故自能除闇

闇若除者必假日光八日若無空無光無照空若無
日闇不自除九然此闇性無來無去日之體相亦不
生不滅十但有日照空則乾坤洞曉以智慧日照心
性空亦有十義準喻思之非唯釋此文亦乃遠通衆
經該羅前後六體寂發照名寂靜光以斯成福莊嚴
身相七八可知九分別法相永離不了愚癡悟法實
性便無執著之見十以行扶願故能現世作師子吼
頌加第四餘並可知第七主水神長行十法一無緣
大慈是日平等二無邊行法莊嚴自他三寂然不動
以觀機感而遂通以隨攝若冬則積雪凝白夏則無

處不流四妙音演佛深旨令悟妙法旋復五身智二
光遍覺開化大充法界清淨無垢六清淨法界性相
俱絕德無不見則大用不亡七衆生不窮故大悲無
盡滿而不溢有知足義焉流止從緣斯爲自在八處
處見佛故大喜無窮喜從佛生卽佛名藏若聆泉流
之響無不悅也九性相無礙之福故能普現神通若
空色相映之流威光蕩漾十調生行廣如空無邊用
靡暫停如空無盡偈中第一偈前半辯一相因果次
句例餘後句辯益初言清淨者離過無緣故門如塵
數者隨宜利樂故以慈爲因得妙相果以相爲因得

無狀果然如來相有純有雜此就純門若以雜門則隨一相一毛皆收如來法界行盡亦相相皆爾純雜無礙因果相融圓成非分成故佛一相一毛卽同法界無有分量今此神從一慈門入無盡相耳此約十身之相若三十二相之因但說一相一因如智度論伽等論涅槃大集等經至相海品當引第五偈初言無盡以顯光常次充法界以辯光遍不思議者以顯光深非色現色非青黃而青黃故其第三句是顯光用餘九可知第八主海神十法頌脫第三一爲物供佛是等施福得衆寶相以莊嚴身二巧隨根欲說法

護善使其長成三謂演深廣法體煩惱空梵本偈云一切世間衆導師法雲大雨不可測消竭無窮諸苦海此離垢塵入法門若準此文乃竭苦海四若見佛境則惑亡苦息準現經文三是煩惱四是於苦若依梵本前苦後惑旣譯人脫漏致使文義參差故古德云脫第四頌結名旣同故知脫第三恒住波浪者卽是普用水爲宮殿五以智滅癡六爲行所遷一切皆苦菩提因起則生滅苦亡便得涅槃寂滅安樂七將智滅癡未免於見了癡見性癡見自亡真妄等觀是佛境也八一切衆生有佛種性圓明可貴具德稱寶

佛眼普觀佛智普示正因令顯如出金藏大心若起如種生芽故云出生緣了二因爲能悟之妙道九了如不取則心不搖動湛如停海萬德攸歸故須彌可傾魔豈能嬖一念降魔如本行集十入法界定如法界遍偈可知第九主河神十法一行成雨法若霈然洪霍滅惑生德若懸河迅流無所滯礙二現身息惱若泉澗洗心三真實滌垢慈智相資若碧沼澄潭空色交映故名離塵淨眼四圓音遍益若崩浪發響五拯救漂溺六善根無惑可謂清涼若阿耨達池永無熱惱七施門無量令彼無慳若蘊藻菱蓮普令物喜

八行福契實故見無不欣若深湖廣陂是爲廣德九方便慧力雜染皆淨慈彼怨害瞋反成歡若萬頃波澄光暎天下十總收萬善令會涅槃若彼百川咸會大海會海由智名海德光明偈亦可知第十主稼神十法一功德智慧二種法味資成佛身二喜樂由於苦除三衆生爲所淨之境四悲深故通廣五下種佛田必至果無壞六智敷物信獲果稱華七慈眼視物故福聚無量慈則恬和怡悅偈云勝道八以行成佛故始成卽宣九懈於修習憂惱是生勤策諸根衆惡清淨十隨根爲說遂求故喜偈文可知第十一主藥

神十法十頌一順情則易攝逆意則難調故普觀之
二三可知四始學者以名爲實實大士以名爲佛事
五以慈善根力放月愛等光身心兩病纔念便滅六
逃理逃報二愚盲冥起惑造業備受衆苦佛以正法
金錍開其智眼令明見三諦故云清淨七八可知九
無愛見之大悲生物德故名藏十世醫療治雖瘥還
生永滅生德無先念佛因病因光皆是方便謂佛有
無邊相相有無邊好好放無邊光光攝無邊衆言隨
念者佛德齊均隨緣隨樂趣稱一佛三昧易成敬一
心濃餘盡然矣況心凝覺路闇蹈大方頌可知第十

二主林神十法十頌一佛德無邊皆依智海含德流
光所以名藏二等衆生悲是爲廣大一一離障名普
清淨三一切勝因皆爲佛道各各心淨則種種芽生
四一切功德莊嚴一毛一一皆然故佛爲德聚良以
佛果攬因皆圓成非分成是故一因生一切果一果
收一切因皆圓融無礙耳五智通萬法是曰普門客
塵不生故曰清淨悟如日照頓周法界功如拂鏡說
智漸明是本明漸爲圓漸六知遍趣行如應布法
七了音聲性皆同佛音故無不可意能令世間皆聞
佛音方云清淨八昔行稱周法界是廣大境神通普

令物見做而行之如下喜目卽其事也九衆生諛佞
自不修德寧有進賢之心今福智益他則物我兼利
偈云諛諛卽諛佞也十敬念則佛興佛興則莊嚴德
藏障重者不念不見於佛豈無常哉故應見常見也
第十三主山神十法一寂而常照故光無不闡二相
光熟機皆慈善根力如涅槃廣明三修因嚴根本爲
順物故矚蓮目而欣樂觀月面而歡心或見諸根一
一皆周法界喜益深矣四如空不染故長劫無怠五
癡故長眠唯福智之能覺欠三可知九若睡若寤皆
令聞法進行斯爲佛業如大瓔珞經說過去有佛凡

欲說法令大衆眠夢中說法令增善根覺得道果涅
槃亦云其人夢中見羅刹像等亦表萬法皆夢大夢
之夜必有大覺之明十稱性法門無邊大義一音能
演是出現也第十四主地神十法一念念無間平等
普觀修慈護法故得金剛之體金剛卽內照之實也
二一毛福力頓現衆福三證入無生不礙嚴刹四一
向爲他五觀機出現名爲遊戲六現淨惑身方調物
惑七內具德海現威力身如地含海潤發生百穀百
穀苗稼皆地香毛故八長行一言盡攝無餘偈頌則
一言普遍無極九焰雲普遍令物離垢爲性十法能

攝持心行如金剛之輪佛則不動現世若須彌出海
此下頌中亦有二句結法屬人可以意得第十五主
城神十法有云脫第九法十頌具足一光等方便成
熟利益二應病與藥令得服行三護法法存則物受
福德教理行果皆有護也四悲救無盡名藏五了佛
大智六方便現身七同修佛德八迷真俗理故云愚
闇佛出開示令其悟入本迷無始猶若生盲雖聞譬
喻竟不識乳唯佛出世方能曉之九準梵本云香幢
莊嚴髻主城神得破一切煩惱臭氣出生一切智性
香氣解脫門謂正使爲臭物殘習爲臭氣智性爲香

體利物爲香氣香氣若高山之出雲稱智性而無盡
臭氣若香風之卷霧等性空之無邊煩惱則塵習雙
亡智慧則自他兼利有本亦具云香髻莊嚴主城神
得開發衆生清淨妙智解脫門亦恐傳寫之脫漏耳
義不異前偈云現夢中者夢是神遊亦見聞之氣分
也夢中尚調況於覺悟如迦旃延爲弟子現夢境界
等十二障五蓋重疊如山非智光明莫之能破第十
六道場神十一法十一偈一出現字兩用謂有佛出
現卽出現莊嚴具而爲供養佛昔如是神以大願做
之二對物成行令物做之施爲行先故偈偏舉三夢

覺皆化則時處俱遍四外寶內眼重重難捨爲物說
行故云能雨五清淨焰形神前列中無謂色相道場
俱妙莊嚴並爲熟物六疑境界者以唯心爲正念疑
法性者以無得爲正念實則無正無邪方稱曰正無
念不念是真念矣諸念不生正念方生耳故隨根雨
法斷疑生智七辯才雨法稱根故喜八深廣讚佛故
名實雙美九樹王眷屬並如經初十卽前身遍十方
而無來往智入諸相了法空寂也十一種種力者佛
有無量力故因行亦然皆嚴具顯示既是道場之神
故得道場事中解脫第十七足行神十法初二可知

三內則念念安於理事外則處處建立道場四舉足
下足海印發輝諸有威儀無非佛事五以華以光雨
寶雨法六衆生無邊是佛化境見佛聞法故生歡喜
七圓音警物等栴檀之香風暫一熏修覺身心之調
順餘三可知第十八身衆神十法一淨喜境界神者
初列處名華髻莊嚴或是名廣略舉其半或梵音相
類譯者之誤未勘梵本法門初三可知四相卽無相
故如空遍住空非獨虛亦遍於色住非分住一塵亦
周如芥子空卽不可盡身與法性不可分故五威儀
施化無心頓現斯卽佛境難以言思六佛爲良田出

世難遇一興微供果獲五常略言色力亦有常命安樂辯才此五皆常方云滿足受報無盡故悉離貧窮七齒光除垢表所說淨故八有染於五塵無慈於六趣者愚癡魔業也體五欲性虛已兼亡彼業斯轉而名云守護攝持者善守根門攝散持德則遠魔矣然魔事惑不出三毒及慢魔惱衆生不出三事謂上妙五欲及諸苦具爲說邪法則三毒是生三毒內著卽爲魔業今守護覺察魔如之何卽偈中解脫道也九有三意一身雖周於法界多示爲王攝御自在故二八相處於王宮俯接物故三法界菩提樹下法王宮

故十迷於本空故有妄苦無漏本有是淨善根第十九金剛神長行十法一見如來身普現非別豈唯凡現之處卽無邊相亦隨一一色相皆無有邊次四可知但第五神初卷中名諸根美妙今但云妙臂文義俱闕又加天主以現爲世主故六法海深奧繁節差別巧說令現無有遺餘七約神且說寶飾爲嚴巧攝已衆約佛方便相好爲嚴無不攝也八因深故大福爲能嚴果勝故德相皆明足九惡謂十惡險者惡之因也能陷自他及險道故十若以現文則摩尼髻是所雨若以義取此神名摩尼髻亦得髻是能雨一切

菩薩嚴具是所雨表菩薩智光圓滿故偈中第六云
漩澗者水之漩流洄澗之處一甚深故二廻轉故三
難渡故法海漩澗亦然一唯佛能究故二真妄相循
難窮初後故三聞空謂空則沉於漩澗聞有謂有等
皆類此知故云一切差別義也餘並可知上來異生
衆竟已下入第五經自下第二同生衆文分爲三初明普賢
菩薩得一切法門次十普菩薩各得一門後十異各
菩薩各一法門此三各有長行及頌就初普賢長行
中二初總標所入二別顯十門今初二句先指陳法
體次辯法功能今初言不思議者謂數過圖度理絕

言思故言方便海者謂不動真而成事巧以因門契
果故云方便後人如來下辯法功能謂證入因圓趣
入果海故然前後但明以別入總故各得一解脫門
猶如百川一一入海今明以總入總如海入海故得
難思解脫門復稱能入爲方便海以普賢是同異二
衆之上首故二所謂下別顯十門以彰無盡一嚴土
調生調隨所化衆生取佛土故一切佛土者豎通四
土橫該法界橫豎相融故一塵一刹皆廣大嚴淨故
云一切演最妙法故令所調究竟出離二佛遍塵道
詣彼修德乃了彼境三通辯安立菩薩六種功德一

位二願餘四在偈四身普應機演所證法五國土不同所敬各異故隨宜立稱成益不空如名號品六塵中現身說菩薩行境七以時隨法融令三世劫及劫中成壞一念中現無所障礙然事通能所能成壞事謂火水及風所成壞事天地萬像八菩薩根海雖繁廣多類但能入自所知境界豈能測量佛無邊法則顯前來衆海未測佛德普賢能知此理九明如來身體同虛空用周法界第十攝因成果故云一切菩薩行人一切智也妙音宣此故云顯示此亦別釋標中第二句頌中次第如前十門第一偈前半嚴淨佛國

後半調伏衆生兼顯人法爲嚴之義佛子有三一者外子謂諸凡夫未能紹繼佛家事故二者庶子謂諸二乘不從如來大法生故三者真子謂大菩薩從大法喜正所生故此言清淨意顯第三最妙法者揀非權小昔以妙法淨所化心故所感土亦有清淨佛子來生其國還雨妙法二中前半明總遍別中後半明體用無礙亦是總遍總中三中四句卽前四義一修十勝行二起十方便三所證十如四正證法界成薩婆若地位爲總餘五爲別四中前半普現身後半演所證次四偈可知九中初句智身次句智身等法身

後二句化用等法身之周遍略舉正覺實通一切故
上云種種十中三句攝因後句成果第二十普菩薩
各得一門第一菩薩前列名中無以前與普賢共爲
十普今普賢別說故加爲十以表圓足然偈文具十
長行中第七菩薩及法門俱脫又脫第八菩薩法門
及第九菩薩名至文當知十中第一嚴處說法皆名
爲嚴二塵塵皆成正覺已爲無盡方是正覺一門有
如是等無量成正覺門如出現品辯隨所成正覺門
調生亦爾故云成熟不思議衆生界三修行福海嚴
出刹海四以深妙智觀難思境故多處不迷多劫不

獸五如一逝多林會頓現一切淨土會會皆爾念念
現殊六法界舍攝無盡故名爲藏觀佛法界之身一
毛卽無分限七梵本中名普覺悅意聲菩薩得親近
承事一切佛供養藏解脫門謂佛昔行因無佛不供
今成佛果無衆不歸猶如百川馳流趣海八準梵本
應云普清淨無盡福威光菩薩得出生一切神變廣
大加持解脫門謂遍刹充塵劫窮來際皆佛加持之
力九梵本中卽普寶髻華幢菩薩得普入一切世間
行出生菩薩無邊行門解脫門卽今經中威光菩薩
法門是由脫第八法門及第九菩薩之名遂令第九

法門繫於第八之下譯者之謬也謂若無大悲不入生死則不能出菩薩行門如不入海安能得寶此卽化他成已十卽依體起用頌文前已配釋欲表菩薩法門互入故不結法屬人後段亦然第三十異名菩薩亦各一法長行中一得成菩薩四種方便一地位二度行三調生卽行位所作四嚴剎通二利因果也或一地一度滿或地地諸度滿此一爲總下九皆別然不出上四多顯調生謂二遍轉法輪三普示滅惑四普嚴場會五以法隨機六爲物永存七法印悟物八頓顯終始九同佛往修十光顯如來難思之境以

偈對釋文金可知唯第六偈略須開示初句所證性淨法身言無相者示真如相身卽體義在纏不染出障非淨凡聖必同故云平等次句出纏法身也真如出煩惱障故云離垢出所知障故云光明又塵習雙亡故云離垢真智圓滿故曰光明淨法身者揀於在纏後半體用無礙身由出纏故應用無方約理卽是體用無礙約用則止觀雙運故得果則寂照爲身卽用之體故寂卽體之用故智體用旣無不在佛身何有量耶故能普應十方此句正顯化用故經云水銀和真金能塗諸色像智慧與法身處處應現往卽斯

衆名出處既多名亦多種略舉上首十名耳卽如次
十方四如是等下結衆數嚴具非一故有衆多剎塵
五此諸菩薩下興供雲六彼諸下供衆海衆多菩薩
各與剎塵供雲已重疊難思況相續不絕而諸供具
皆稱雲者乃有多義謂色相顯然智攬無性從法性
空無生法起能現所現迥無所依應用而來故來無
所從用謝而去故去無所至而能含慈潤澤法雨益
萬物重重無礙有雲像焉上下諸文雲義皆爾七現
是雲已下明敬繞佛順向殷重瞻望不足乃至百千
八隨其下坐本方參而不雜也如師子子亦師子故

菩薩座亦名師子自化自坐者自心智現還自安處
故諸佛菩薩坐多趺者爲物軌故智論引偈云若
結跏趺坐身安入三昧等九是諸菩薩下歎其德能
者有十二句初總餘別別顯一一各是一種清淨廣
大略束爲三初三明三業清淨廣大一智證普法二
身隨佛行三語入辯海中一義求亦通三業次三明
得法清淨廣大一獲自分解脫二住勝進果位三遍
具諸持普門地言卽同經初已踐如來普光明地後
五福智清淨廣大初二正明後三重顯今初中一智
安理事故云善住二福無不修故生信喜然三世平

等經初已明今更略示謂依生及佛善住平等且依佛說佛佛平等法身智身無增減故若依衆生生生平等煩惱業苦有支皆等若生佛相望者凡夫現在等佛過去進修得果等佛現在成佛究竟等佛常住此約三世互望煩惱佛則本有今無衆生則本無今有菩提則衆生本有今無諸佛則本無今有約迷悟異則說本今涅槃之性非三世攝故知三世有法無有是處若以性淨而說則佛與衆生現今平等而不妨迷悟之殊是故三乘亦有差別亦無差別衆生寂滅卽是法身法身隨緣卽是衆生故寂滅非無之衆

生恒不異真而成立隨緣非有之法身恒不異事而顯現是故染淨三世一切諸法無不平等況稱性互收如是解者名爲善住一切智地如地能生終歸於地萬法依於佛智究竟還至一切智也後三重顯中一淨前福障故令諸福無邊清淨二成上智慧由觀法界虛空三近勝緣故成前二十爾時下說偈讚佛中十菩薩各別說偈卽爲十段就初海慧頌中歎佛身座初五歎佛身具德一讚智慧二讚功德三神通四因深五果勝後五歎所坐嚴麗此衆旣從座現故多歎座文並可知第二雷音菩薩十頌歎座及地文

分三別初四直歎座可知次三歎於場地卽轉顯座嚴於中初一總顯因深德廣故嚴事難思金剛下別顯末後一句結瑩寶座後三偈歎地上之嚴於中前二地神興供嚴後一佛力展轉嚴第三衆寶光髻菩薩讚中獨讚場地殊異德十頌分二前五德用圓備後五法化流通言如佛座上所應演者九會五周之文一化隨宜之說已具演於場地之中第四大智日頌歎佛所處宮殿十頌分二初一總明次段讚處彰人故此偈標人顯處疑者嚴整之貌睟者視也謂肅然而視後九別明於中二前四明宮殿體攝衆德卽

廣其前半後五明妙用自在卽廣其後半今初初一宮殿雖耀佛坐增明卽廣前炳然照耀宮殿中也次二頌略辯七嚴結以智海廣上凝睟處法堂也謂內持寶柱簷垂金鈴外列門階上羅華帳寶樹交映寶璽周垂爲七嚴也闔小門也洞達也如雲布者重重無量次次相承也上云凝睟則目視不瞬特由內無識浪故云智海湛然次一頌羅以寶網列以香幢布以焰明覆以嚴具結云超世卽廣上世尊處法堂也光如雲布者若彩雲向日上下齊明也後五中一羅身雲以調生正顯前文現十方土二寶樹現三世之

嚴三略舉多嚴四卽上諸嚴卷攝多嚴重重佛坐五結歎無盡主伴雲會第五不思議菩薩通讚場樹自在德十頌分二初一總顯謂宿因願力深廣難思神通現緣生果嚴淨後九別顯分三初五歎樹具德嚴場於中初二身幹森聳次二枝葉蔭映後一華果芬輝二有一偈歎場地蓮網謂蓮華布地則下轉光輪寶網羅空則雲間響發三有三偈歎樹自在初一收入後二出生第六百目菩薩頌中雙歎場樹備德自在法化宣流前九偈各一門後一結嚴周遍金顯可知第七金焰頌歎佛十方功德一頌一力下諸經文

屢明十力是佛不共之德佛佛等有菩薩緣此發心梵行品云復應修習一一力中有無量義悉應諮問故不可不知然大般若五十三顯揚第四對法第十四廣辯今略以七門分別一立意二釋名三自性四作業五次第六差別七釋文然了其名則知作業對文料揀差別易見故將作業差別并釋別名並於釋文中顯今初立意者智論意云顯佛大人有真實力令外道心伏二乘希向菩薩倣之能成辦大事終獲其果故須辯之如來唯一諸法實相智力此力有十種用故說爲十謂於十境皆委悉正知故由時品類

相續分別有無量力度人因緣故但說十足辦其事
謂以初力知可度不可度次業力知有障無障以定
力知味著不味著以根力知智多少以欲力知所樂
以性力知深心所趣以至處力籌量衆生解脫門以
宿命力分別先所從來以生死力分別生處好醜以
漏盡力知衆生得涅槃佛以此十度生審諦故但說
十第二釋名初總後別今初總名力者能摧怨敵義
不可屈伏義故說名力瑜伽云與一切種饒益一切
有情功能具相應故畢竟勝伏一切魔怨大威力故
說名爲力對法云善除衆魔善記問論故十名力十

者是數帶數釋也別名至文當釋三自性者瑜伽五
十七云佛具知根慧根爲體對法論云若定若慧及
彼相應諸心心所爲性菩薩地總以五根爲性統其
文義應具六種一最勝體故決擇分中慧根爲性二
引生體對法兼定三剋實體菩薩地云五根爲性由
慧勝故且說十力慧爲自性所以但言處非處等智
力不言信進等力四相應體對法兼取相應心法四
蘊爲性五眷屬體五蘊爲體定共道共無漏色等助
爲體故此雖無文理必應爾遮犯戒垢助摧怨故六
依此經融一切法以爲其性無礙法界理應爾故四

作業者卽是辯相至文當顯五次第者諸文或有前却各有所由此文所列次第與十住全同淨行品則界在解前梵行品禪定解脫當其第三宿命居天眼之後餘同此次瑜伽四十九及智論二十七亦禪居第三餘同此次且依論明次第者智論云初力爲總餘九爲別於初力中分別有九故初一力通知萬法下九展轉開之謂初令知因緣果報故起業力次業煩惱故縛淨禪定解脫故解令去縛就解次根有利鈍鈍者爲有造業利者爲不生故集業由善惡二欲成上下根此二種欲由二種性以有種種性因緣故

行二種道謂善道惡道次知其過去審彼未來次以方便壞其因緣果報相續故說漏盡瑜伽有多門次第廣如第五十說上來依論次第而今禪居第七者二論梵行爲對自業有離欲不離欲故禪居第三此經十住爲對遍趣行有清淨不清淨故居第七若習欲成性卽界居欲後若由性起欲則界居欲前若執常者先說宿住若爲執斷先辯其天眼餘無別理故經論皆定六差別者謂此十力展轉相望亦有差別亦無差別至文當明七釋文然此經宗異義皆融攝故一一力中具攝十力乃至包盡法界是以宿命乃

云智包三世天眼則見盡法界非唯見盡佛眼如空
卽是法界非唯智包亦能毛孔頓現業力卽觀法性
豈唯但是有爲約門有殊故他宗不壞第一偈卽處
非處智力謂善因樂果斯有是處善因苦果無有是
處惡因苦果等例上可知處者建立義依義起義能
建立果與果爲依能起果法故立處名於此正知故
名智力其作業者卽如實知因之與果及能降伏無
因惡因種種諍論旣遍知已可度者度不可度者爲
作因緣文中上半往因下半顯智力於諸境界正解
明了卽辯此力通知一切法也第二偈卽過未現在

業報智力瑜伽名自業智力今言一切業者謂於三
世中善等三業及順現等皆名自業於自所作受用
果業如實知故與初何別若正了知所造善等業感
愛等果此由初力若了能造善惡等業感愛等果是
自業力文中上半往因下半現果第三偈卽根勝劣
智力謂信等五根此輒中上名爲勝劣於此正知及
能於彼如應如宜爲說正法卽是作業偈中三句往
因一句今四卽種種解智力亦名勝解謂若從他
起信以爲其先或觀諸法以爲其先成輒中上愛樂
名種種勝解亦名爲欲欲謂信喜好樂如或貪財利

或好名聞好定好慧種種不同如來正知令捨不淨增長於淨此與前根何異根約宿成智有多少解約現起好樂不同論云若照諸根爲先彼彼法中種種意樂是根智力若正分別意樂差別是解智力在文可見五卽種種界智力界卽性也謂或一二三四五乘性等或貪瞋癡等分行等乃至八萬四千行各種種性性卽種子解卽現行故智論云性名積集相又九十云性內欲外用性作業必受果報欲或不爾瑜伽云若照勝解所起相似種子此由解力若照卽彼種子差別由界智力若習欲成性復云何別欲唯大

地一數性通諸數卽寬隘不同也智論云習欲成性性名深心事欲名隨緣起若性卽種子與根何異根唯信等優劣性通善惡不同以信等望果寬長能生人天三乘聖道爲道之根三善根但是翻對不望果義尚不名根況性通於惡豈得同耶偈云悉能顯現毛孔中者謂非唯佛智如空包納衆生之性毛孔內空亦現衆生之界耳六卽一切至處道智力論名遍趣行智力遍卽一切趣卽至也行卽道也謂諸衆生種種所行若出離行不出離行各能至果如行有漏行生五道中行無漏行至涅槃果名遍趣行若知如

是種類行跡趣入此由界智若知即彼行跡一切品類如是行跡能令雜染如是行跡能令清淨此由遍趣智力初力處對非處此中但明至處又初力指因為得果之處此約果是酬因之處故不同也經中初句總標次一念即能知迅速下十二字所知時處後一句委悉開示七即禪定解脫三昧智力淨行品中加於染淨通漏無漏故佛皆善知及知依此所得諸果故名智力此與自業智力何別若了諸有能修諸定即彼能入而非所餘名自業力若了依如是靜慮等等定現三神變無倒教授所化有情此由靜慮智力

偈中上半所知下半善用言佛為示現者示其諸定現三神變令有情喜使滌煩惱即令去染而得清淨八即宿住隨念智力謂過去境本生本事住宿世故名為宿住於此宿住而起隨念念俱行智名宿住智力瑜伽云若知前際隨念一切趣因是遍趣力若知前際名姓苦樂等事名宿住力此與智論云何會釋謂彼論云但知宿命所經不知諸業因緣相續但名為通凡夫亦得若兼知業因緣相續則名為明二乘能得若知上二無量無邊則名為力斯則力亦知因矣故應通云若但知因是遍趣力若雙知者即宿住

力瑜伽爲對遍趣之因故但云果耳文中初句標能
念智包三世者三世全在佛智之中況於隨念不知
三世從門別故但云宿住剎那悉現卽包現之時極
促現毛孔中卽能現之處至微第三句卽所現所念
之事廣第四句結歸智力非唯能念亦能現也九天
眼智力獨此從所依以立名也若從境者瑜伽名生
死智力謂死此生彼墮善惡趣大小好醜皆能正知
知前際生死名爲宿住要知後際得此力名今文乃
云佛眼者若約五眼餘眼在佛皆佛眼故此非經宗
今依十眼佛眼能見如來十力故此一力卽攝十

力舉一爲例餘九皆然文中初句體大次句用廣次
句用勝以無等故後句結其甚深故唯佛能演旣言
普見法界非局未來約宗別故於未來門普見法界
也十漏盡智力於自解脫無惑無疑亦知衆生漏盡
涅槃於此正知名爲智力文中初二句所斷諸結卽
現行隨眠卽種子習氣卽餘習二乘不能盡習亦不
能盡他漏故不名力後半顯佛能滅然上十力智卽
是體力卽是用然智卽力更無別性此中宿住隨念
相應智力是隣近釋自餘從境皆依主釋設天眼從
所依亦依主釋若宿住是境隨念相應智力亦依主

釋然此十力望於自事各於自事中大如水能淨如火能燒各有自力若約總攝初力爲大若約辦得涅槃漏盡爲大若以無礙解脫而爲根本則平等平等第八法界頌中歎佛往修十度行滿今得果圓十一頌分二初一總餘十別今初也佛威神力略有三類一者俱生力謂風不動衣等二者聖威力謂通明等種種功德三者法威力謂波羅密圓滿法力令五根中無諸非淨四支百節有無量力故名堅固不可壞法身常身無邊之身言遍十方者卽無邊身廣大示現謂變化身無分別者平等智身大菩提行者波羅

密身昔所滿足者衆行先成皆令見者大果今出二有十頌別顯一頌一度皆上半往修因下半今得果十度之義十行十地一經始末亦多辯之須粗識其相略啟十門一釋名二出體三辯相四建立五次第六相攝七修證八約教九觀心十釋文今初又二先通名後別稱今初通稱波羅密多者唯識云要七最勝之所攝受方可建立波羅密多一安住最勝謂要安住菩薩種性二依止最勝謂要依止大菩提心三意樂最勝謂要慈愍一切有情四事業最勝謂要具行一切事業五巧便最勝謂要無相智之所攝受六

廻向最勝謂要廻向無上菩提七清淨最勝謂要不
爲二障間雜卽三時無悔若七隨闕非到彼岸故此
十度應各四句分別其別稱及出體三辨相至支當
釋四建立者爲十地中對治十障證十真如故但有
十爲對六蔽漸修佛法漸熟有情故但說六六中前
三增上生道感大財體及眷屬故後三決定勝道能
伏煩惱成熟有情及佛法故又前三饒益有情施財
不惱忍彼惱故後三對治煩惱勤修加行永伏永滅
故又由前三故不住涅槃由後三故不住生死能爲
無住涅槃資糧後唯四者助六令滿方便助前三願

助精進力助靜慮智助般若如深密說五次第者謂
由前前引發後後及由後後持淨前前又前前麤後
後細易難修習次第如是六相攝者此十一一皆攝
一切波羅蜜多互相順故般若論云檀義攝於六資
生無畏法等智論云有未莊嚴波羅蜜卽不攝者有
已莊嚴波羅蜜卽相攝者今此經文必具攝十若但
說六六攝後四若開爲十第六唯攝無分別智後四
皆是後得智攝七修證者五位通修佛方究竟十約
因位總有三名謂初無數劫施等勢力尚微被煩惱
伏但名波羅蜜多第二劫去勢力漸增能伏煩惱名

近波羅蜜多第三僧祇勢力轉增能畢竟伏一切煩惱名大波羅蜜多故上下文中屢言廣大波羅蜜也八約教者諸教可思此教要須一一融攝徹果該因九觀心者可以意得十釋文中第一偈明施度輟已惠人名之爲施卽以無貪及所起三業而爲其性此有三種謂財法無畏上半因中大悲行施已該此三此悲亦是七最勝中前三最勝下半果中財能資身無畏益心法資法身故得果身身最殊妙三皆悅物故見者必喜亦由具七最勝故身殊妙也二戒度防非止惡名之爲戒卽受學菩薩戒時三業爲性戒有

三種律儀攝善得淨身果攝衆生戒能除物苦遍十方者無作戒身等衆生故三忍者堪受諸法未能忘懷名之爲忍此約生忍又忍卽忍可忍卽是慧雙忍事理卽以無瞋精進審慧及彼所起三業爲性忍亦有三謂耐怨害忍安受苦忍諦察法忍偈云信解真實卽諦察法也色相圓滿前二忍果放淨光明第三忍果四精進者練心於法名之爲精精心務達目之爲進以勤及所起三業爲性亦有三種一被甲二攝善三利樂初句通前二以被甲精進喻伽釋云設千大劫爲一日夜處於地獄唯爲脫一衆生故次句卽

第三下半通三果也因既離身心相故果能身遍十方五禪者梵云禪那此云靜慮卽以等持爲性亦有三種謂安住引發辦事旣引起神通辦利生事故見者深喜現法樂住諸惑不行又資慧斷惑故見者惑滅六般若者般若梵言此翻爲慧推求諦理名之慧也此及後四皆擇法爲體亦有三種一生空無分別二法空無分別三俱空無分別攝論以加行正體後得爲三約六度說瓔珞以照有照無及照中道而爲三者唯約法空三觀之義至下當明慧導萬行故云修諸行海言具足者具上三也因如有目故果獲身

智二光能滅諸闇七方便者卽善巧也方謂方法便謂便宜下四但各二種今初謂迴向方便拔濟方便文云種種化生卽拔濟善巧所修成就兼於迴向善提所化無邊果得十方而橫遍爲物取果豎窮來際而不休八願者卽希求要誓有義卽以欲勝解及信爲性亦有二種謂求菩提願利樂他願由初願故出現世間由後願故救生不息九力者不可屈伏故隨思隨修任運成就亦有二種謂思擇修習今言法力卽思擇諸法而修習故攝論由此二力令前六度無間現前經云成自然力卽無師而成不習而無不利

何能壞哉十智度決斷名智謂如實覺了亦有一種
謂受用法樂智成熟有情智無性論云由施等六成
此智復由此智成立六種名受法樂由此妙智能正
了知此施戒等饒益有情經云普門智總含二智別
配卽初句成熟有情次句卽受用法樂此二無二故
成無礙力舒光普照第九雲音頌述菩提樹摩尼果
中歎佛往修十地行果十一頌分二初一總舉謂佛
果大用由昔地行及結說處餘十次第各述一地利
義當品廣明今皆略述而已初地略述四義一加行
多劫諸論皆說地前爲一僧祇已爲無量更有異說

恐狀繁文二標入地名三出生廣智謂生如來家見
法實性得妙觀察平等性智故四普見佛海同下願
智果中二地四義一舉法標名二別地行相三修行
時分四供佛多少三地四義一舉法標名世間中極
云積福德二修諸禪定三忍度偏多四聞持廣博四
地四義一歎慧標名世無等故二了道品境異凡夫
故二起慈悲異小乘故四淨身土離身見故五地四
義一標入地謂積集福智故云普藏十平等心故曰
等門三標地名三真俗極違會令相順四諦法俗境
無不等觀六地有四一歎行二標名三正顯行相卽

了緣起法四明地用得十空三昧故七地有四一先
標果用二照達羣機三雙行巧攝四寄行標名八地
四義一別地行相二明淨土果三略釋地名四歎地
結說九地四義一標地作用二善達教法三標示地
名四廣行多劫十地有四一標起地名二含藏法兩
三能蔽如空麤重四深廣難測故云佛境諸偈多有
結說文並可知第十善勇猛說頌儀中前文多皆觀
衆會此觀十方者觀衆表無偏心觀方表說周遍二
文影略十頌歎佛體用應機自在德文分爲三初一
總顯次八別明後一結歎歸佛一一頌中各有四義

今初總歎佛令物悟入福智有四義者一多衆二心
異三悟智四了福莊嚴卽福也亦通二嚴皆佛令爾
故顯衆德卽爲歎佛別中一見佛體用亦四義一起
願二具行三見體四見用二見法身一勝故無等二
淨故無礙三大故周遍四深廣故包含三見佛色身
一色妙謂如金等二相具十華藏相等三光盛謂常
放等四隨機變謂三尺無邊等四見佛智身一無礙
無二礙故真俗無礙故二等空稱法性故三知根四
巧現五了佛音聲一音普遍二說應器三言同類四
應無礙六見佛光明一多種二遍照三見佛四現變

七見佛毛光一顯光名二明出處三示往因四令信
悟八見佛福相一見福相二了福因三示因體四明
見處後一結歎德廣一數多二深廣三用普四結說
謂推功歸佛謙已無能上來總明第八大段座內衆
流竟自下第九明天地徵祥謂動地興供卽是顯證
上來佛成正覺衆海雲集各申慶讚顯佛高深而下
稱機情上協佛願故世主爲之興供天地爲之呈祥
就文分二先動地後興供前中三一動處二動因三
動相今初自陞之寬且云華藏約下結通實周法界
諸天重重金華藏之內故云其地何所不該又染淨

融故雖標摩竭而地震華藏二動因中就主顯勝但
明佛力感應道交亦由物機然汎明動因總有其十
今當轉法輪亦兼成道餘如別章三動相者其地下
是震卽是聲動卽是形聲兼吼擊形兼起踊故有六
種此六各三成十八相搖颺不安爲動自下漸高爲
起忽然騰舉爲踊隱隱出聲爲震雄聲郁遏爲吼砰
磕發響爲擊十八相者唯一方動直爾名動四方若
次第若一時動者名爲遍動若八方次第或一時動
名普遍動又四方八方十方如次名三相動又一方
獨動十方次第動十方同時動又爲三相餘五例之

然動何所爲依勝思惟梵天經所爲有七一令諸魔怖故二爲說法時大衆心不散亂故三令放逸者生覺知故四令衆生知法相故五令衆生觀說法處故六令成熟者得解脫故七令隨順問正義故此上七緣正是今經所爲地論有四非當此文上約外器若心地聖賢地法性地亦有震動等義可以虛求二與供中三一標數同生之衆亦得稱主爲物依故二所謂下略列三此諸下結遍第十如下結通無盡文分有二一結華藏內二結華藏外前中亦二先舉此界二其華藏下類華藏中一切世界於中三初類衆

海與供一切世界者謂華藏中有十不可說佛刹微塵數世界種一一種中各有不可說不可說佛刹微塵數世界彼等一切諸世界中悉有世主而爲供養二其一切下類佛坐道場然有二義一彼諸世主各供當處之佛二彼諸世主亦供此佛此佛亦坐彼界道場三一一下類結大衆得法於中有十一句爲聞法得益得益有三一聞益各各信解故謂信其言而解其義二思益謂於所對審緣慮故三修益修益有七一修門謂三昧方便故二修法謂資糧助道故三修果契理成就故四修益隨有所得成法喜故五修

轉各各趣入無量乘門及衆生界故六修同悟解法
門合先聖故七修極修極有三一大悲極入佛神通
境入佛神通境但爲益生故此成恩德二大智極入
佛力境如來力境悲智超絕無能及故成佛智德三
自在極入如來解脫門盡一切障心境自在成佛斷
德亦卽是前諸解脫門二如於此下結華藏外謂以
華藏例於法界各有此會同爲一大法界會方是華
嚴無盡說耳上來十段總明教起因緣分竟

大方廣佛華嚴經疏卷第八

音釋

跏趺古牙切跌芳無雖遂切清協檄頰切颺
餘亮切風跏趺屈足坐也和潤澤貌合也

碎磕碎披耕切磕克盍切

飛物也

丹陽居士賀懋熙懋熙懋懋瑩懋懋懋燁燁仰承
先嚴賀學禮遺願施贊刻此
大方廣佛華嚴經疏卷第八
計字七千六百
九十三個
該銀三兩八錢四分六厘
海虞弟子契慧
淨住沙彌契机同對
崇禎二年夏月徑山化城寺識

大方廣佛華嚴經疏卷第九

唐清涼山大華嚴寺沙門 澄觀撰

如來現相品第二

此下第二正宗分從第六經盡第十一

將釋此品四門分別一來意二釋名三宗趣四釋文
然下諸品多用此四若有增減至文當辯今初來意
中二先分來後品來今初三分之中自下正宗由致
旣彰正宗宜顯故次來也四分之中已明教起因緣
次辯說法儀式故次來也二品來者曲有二義一前
辯衆集今顯疑現相二前明舊衆今辯新集故次來
也二釋名者一分名者正宗正陳宗旨揀序流通若

四分中名舉果勸樂生信者舉依正果勸物信樂是
故亦名所信因果亦名說佛依果會以從多說故二
品名者如來是能現之人相是所現之法現通能所
能所合說體用雙陳以立其稱然如來現相各有五
義以成其十如來五者一就理顯謂法性名如出障
名來二唯就行瑜伽云言無虛妄故名如來涅槃三
十二亦同此說三理智合說轉法輪論云第一義諦
名如正覺名來正覺第一義諦故名如來此與成實
大同四離相說般若云如來者無所從來亦無所去
故名如來五融攝說謂一如無二如若理若智若開

若合無不皆如故名爲如如外無法來亦卽如如是
來者是眞如來現相五者一現面門光相召十方衆
二現眉間光相示說法主三振動利網以警羣機四
佛前現華表說依果五白毫出衆表教從佛流如是
等相是如來現相品中辯此故以爲名三宗趣者亦
二一分宗三分正宗已如上說四分之宗卽以佛果
無邊利海具三世間無盡自在故以爲宗令諸菩薩
發生淨信修行涉求以之爲趣二品宗者以光相表
示爲宗令上智玄悟爲趣四釋文者此下二品說法
儀式是當分方便卽分爲二初現相品爲遠方便後

三昧品爲近方便今初一品大分爲六一衆海同請
二光召有緣三所召雲奔四現瑞表說五稱揚佛德
六結通無窮今初先以五門料揀諸會請問之殊一
問之有無二所問法異三能問人別四儀式不同五
疑之權實初中前二後二此四有問中五皆無謂初
會標果起因故問第二會尋因至果故問但因有升
降寄六會以答之果無差別第七當會答也然諸會
更有問者金當會別義以總收之或重明於前非大
位問第八會明因果純熟故須有問謂行修無礙六
位頓成故當會答第九會明稱性因果故別有問謂

俱入法界無差別故亦當會答四處都有三百一十
句問謂初及第二各四十問第八二百第九三十中
本廣本問則難思二所問異者初兩會問果廣因略
爲成信解故第八會問因廣果略爲成行故第九會
問全同初會而因舉主佛之因明因是果因顯唯證
故三能問人異者初及第九皆同生異生二衆齊問
以所問法衆同依故第二會中唯同生問以所入位
同生勝故八唯同生一人自問以造修之行各自成
故四請問儀式復有二義一約言念二約通別初中
請有二種一言二念答亦有二一言答二示相交絡

撰述
相望應成九句在文唯四初會之中具二問答謂現
相品長行念請供聲言請初光示法主現華表義現
衆表教卽示相答三昧品中以言重請下之三品亦
以言答第二會唯念請如來示相答菩薩言說答佛
心自在不待興言佛力殊勝現相能答第八會言請
言答此顯菩薩不同佛故第九會念請示相答顯以
心傳心唯證相應離言說故二通別者初後二會別
問通答二八兩會別問別答又初會亦得是別問別
答次文當明第五疑之權實者問諸王菩薩位皆圓
極何得有疑有云爲衆生疑故有云希佛果故又顯

因果懸隔故然上二解初權後實並皆有理可通餘
教然此經中若實若權無非法界之疑以疑爲有力
與所說證爲緣起故此事舊爾海印頓現疑之與答
念念常疑念念常斷其猶像模因模之高成像之下
因模之下成像之高緣起法界理應爾故次正釋文
文分二別先長行念請後供聲偈請前中亦二先舉
人標念謂盡於衆海皆希佛境並欲利生成緣起門
故標同念二云何下正顯問端有四十句且分二別
前二十句直爾疑念請後二十句引例舉法請準義
二文皆應具舉互有影略不欲繁辭故下偈中更不

引例合二處文直爾請說第二會中亦有此二而引
例中問同此直請正欲顯於諸佛道同影略之義又
四十句中初二十句問果後十問因中間十句明化
用普周通問依正染淨因果前是所求後是所行中
是所知故分是舉果故先問果據斯義類亦可分三
今以兩段皆有結請故但分二前中亦二先正疑念
後明結請今初前十句問德用圓滿後十句問體相
顯著今初十句文唯有八偈有神通及自在二問世
界成就品初答中亦同此有今文闕者或是脫漏或
是義合無能攝取之中攝此二故故下法界品中闕
無能攝取及與神通唯有自在故此三事合則可一
開則爲三故出沒不同言佛地者卽智德分位然此
經宗通收萬德故廣則無量略有十種如上所引同
性經說然體不出五謂清淨法界及與四智以斯五
法攝大覺性具如佛地經及彼論說然要唯有二無
所不攝謂真理妙智融而無二是諸佛地並有生成
住持功能故名爲地此句爲總該攝諸德下明佛果
皆答斯問二佛境界下諸句皆別明佛地之德言境
界者悲智所緣故亦分齊故廣亦無量略有十種如
出現及問明不思議品廣說然出現多明體遍不思

議品以辯超勝故云十種無比境界問明該其因果
體用小有不同至文當知若準瑜伽如來境界謂五
界差別一有情界二世界三法界四調伏界五調伏
加行界或說要唯有四一所緣真俗二所住剎海三
所起業用四所應攝化金如下說此與瑜伽大同總
唯有二謂佛卽境約分齊說或佛之境約所觀化等
今文多顯佛之境也三佛加持者謂佛勝力任持令
有所作廣亦無量略有十種如不思議法品及法雲
地說離世間品十種佛所攝持亦其例也然不出三
類一如加持化身及舍利等二如加耆婆入火不燒

等三如加非情作佛事等此與神通通寬隘不同謂六
通中唯神境一有加持故今此加持卽是神力四所
行者是佛所作或說十種如不思議品云諸佛世尊
有十種化不失時等亦是所行之行如出現品謂無
礙行是如來行等或大悲攝生或大智造緣無思成
事方便善巧所作究竟皆名爲行然約人望行標云
所行旣是所作實通能所故不同彼境界之中彼智
所觀所應攝化但就所故況所望不同故不相濫若
準瑜伽七十八中引深密經佛答文殊此二別相云
所行謂一切種如來共有不思議無量功德莊嚴淨

撰述
大方廣華嚴經疏卷第九
十
十
土如來境界謂一切種五界差別五界如前五佛力者卽佛大力自在廣有無量略說有十卽處非處等又有十種謂廣大力等如不思議品六無畏者無諸畏懼故離世間品說有十種無畏或說四種如常所明昔云前四是異二乘功德佛力是破魔功德無畏是伏外道功德未必全爾十力無畏亦不共二乘故然上來多明大智功德七佛三昧者謂佛果等持數過塵筭如師子嚧申等略說十種如不思議品說佛有無量不思議三昧等八準答及頌名佛神通者謂依定發起無礙神用或說有十如十通品不思議品

云一切諸佛有無邊際無礙解脫示現無盡大神通力十通唯局菩薩或說有六如常所辯然名通大小九準答及頌名佛自在謂所作任意無礙成就故廣有無量或說百種謂於衆生自在等各有所略有十種謂命自在等並如離世間品說不思議品亦說有十謂諸佛世尊於一切法皆悉自在等十無能攝取者頌名無能制伏答中名無能毀壞謂佛所作無有天上人中沙門魔梵及諸二乘大菩薩等神力能制是故舊經翻爲佛勝法也略有十種如不思議品諸佛有十種最勝法等若取無能毀壞卽十種大那

羅延幢勇健法是上之十問多在不思議品至下當
知二云何是諸佛眼下十句問體相顯著謂六根三
業於身業中開常光爲身光放光爲光明故有十句
不思議法品諸佛有十種法普遍無量無邊法界謂
無邊際眼等離世間品一一各以十門辯釋又出現
品說佛三業各具十義然諸經論說佛常光一尋準
不思議品常妙光明不可說不可說種種色相以爲
嚴好爲光明藏出生無量圓滿光明普照十方無有
障礙然放光則有時不放如諸會面門毫相所放之
類然相海品其一 一相常放光明斯卽放光亦通常

光而分別者常卽湛遍放則見有去來故言佛智者
廣卽無量略說有十體不出五謂清淨智及大圓鏡
等四智要唯有二謂根本後得總攝唯一諸法實相
無障礙智此之十句多如相海及隨好品二惟願下
結請將欲引例故且結請二又十方下引例舉法請
亦分爲二初引例後結請今初分二前十句問化用
普周後十句問因德深廣今初文唯有九闕安立海
一世界海者是化用處如華藏品二衆生海是所化
機卽剎中所持三準答及頌名法界安立海如世界
成就品通明法界所安立海起具因緣等故若因緣

者賢首云所化生法也亦是前二於法界中施設安立故諸經論皆說世諦爲安立諦然安立言梵云柰耶而義多舍或云理趣或云方便或云法式或云法門或云安立故知卽安立法式也四佛海者能化主也如牽藏品廣舉其名亦如不思議等品五波羅蜜海者化所成行如離世間品六佛解脫海者化所得果如法界品七佛變化海者臨機神變化難化衆生卽身業化也如諸會不起而遍光明覺品長行身業阿僧祇等皆是其文八佛演說海者稱根說法語業化也如四諦品九佛名號海隨機立稱如名號品十

佛壽量海者隨器所感住世修短如壽量品二及一切下問因德深廣中一創於生死立大誓願二勝進大心趣求佛果三積集菩提福智資糧四運諸菩薩從因至果五慈悲喜捨四菩薩行六謂永背業惑證契真理餘四可知然此十句有通有別別則初二寄十信次二十住次一十行次一十向以向出離故次三登地已上後一等覺此約橫論一切菩薩若約通說各通始終卽豎論一切菩薩也故此十句文通行位然皆普攝法界深廣無邊故云海也益如下諸會說二願佛下結請既是引例故致亦言此四十句答

撰述
文在何問有通局答亦如之通卽諸會與此相應皆是答此上所引者居然當之謂前衆海旣是九會常隨豈得此問局於初會豈復衆海問不盡耶故知初會爲總九會同答此問而爲分意別故諸分初皆重舉諸問則顯分分之中皆通因果等故則從此盡光明覺答十海問問明已下答十因問不思議品下答二十句果至下當知又就四十問十海爲總九會同答十海一世界成就品答世界安立海二華藏品答世界海遮那但引因釋成現相三昧但是說法由致僉非別答海問三名號品答如來名號海四四諦品

答演說海五光明覺至十忍品別答十句因問通答衆生海修因之人卽所化生故六阿僧祇品答變化海長行舉數欲顯化用難量故偈中廣明變化重重微細難說七壽量住處皆答壽量海八不思議等五品別答二十句果問總明佛海就德深廣以顯佛故九第八會答波羅蜜海總攝諸位皆成行故十第九會答解脫海證入法界起大用故問中爲次與答異者問約本有修成自行化他而爲次第謂先有世界衆生則有佛出修因得果故波羅蜜海是因解脫是果餘四皆大用謂臨機變化隨宜說法稱物立名隨

物修短答中先人後已故大用四海居先自利因果
二海居後又衆生一海亦可通在九海皆爲生故種
種隨宜顯生多故若約局言當會答盡此復有二一
現相答下文當示二者言說答此亦有二一經來未
盡二答二兼餘成就品當引第二爾時下供聲偈請
中分二先明因緣後正說偈今初前請在念佛雖已
知今請彰言使大衆同曉前旣爲法興供今乃以供
宣心不因拊擊故曰自然非無因緣卽菩薩威力同
異生衆皆菩薩也又表身口爲供具故供具皆卽法
界體故二正說偈中十頌分二初三歎德請後七舉
法請前中亦二初二歎佛明具說因後一歎衆明具
說緣今初也前偈卽悲之智已滿爲物現身後偈卽
智之悲已圓能斷疑除苦有悲必普有智必能故應
說也後一歎衆請中前半歎衆顯無異念後半結請
明說則斷疑後舉法請中分三初四述前初十句問
小有不次但取文便及餘一切廣大法者結例所餘
謂二十句外佛無邊德亦願說之不思議品廣說餘
門諸說果處皆答此也次一頌述前體相顯著十句
略示可知後二頌述化用普周十句之問現文唯七
以佛海中舍於神變壽量名號以此三海不離佛故

不問因者長行名通諸會故列因疑今彰初分請當
會答又顯此會因略果廣第二會果略因廣故第二
爾時世尊下明光召有緣分長分爲十一放光意以
領念故供聲易了故略不明念但疑法何以放光現
相答故答相云何謂佛三昧力加持放光令菩薩來
遠遠能爲此卽佛地境界是佛所行無攝無畏故此
爲總意若別明者如文思之又召來菩薩亦是言答
上之十問至文當知二卽於下明光依處面門卽口
言衆齒者表四十問教道還舒口生真子故咀法滋
味益法身故總處放者此會總故三放佛下顯光體

隨機多演故四所謂下列光明略列十名皆從體用
立稱五如是下結光數六一一下彰眷屬七其光下
辯色相衆寶隱映表教道含容八普照下明光應遠
九彼世界下彼衆感通十以佛下偈聲命召卽通舉
十號示爲所歸十偈在文且分爲五初六偈自彰因
果已圓勸同觀禮於中初一總明二利因滿成正遍
知次一毛光開覺是明行足次一頌往來諸趣是世
間解一念解脫可謂善逝次一云成正覺卽佛義焉
次一大音演寂謂無上士隨心開覺是調御丈夫次
一諸力皆圓卽天人師也二有一頌明衆海已集引

例勸歸既云已雨諸雲爲供是應供也爲對引例故不當次三一頌圓音隨機見必蒙益結云兩足尊卽世尊也四一頌義海頓演宜速及時如三世佛大願而來故結云如來也五一頌特命有緣是光本意第三爾時十方下所召雲奔文分爲三第一同會道場第二現自在用第三聲光自述今初亦三初總明二所謂下別顯三如是等下總結別中十方卽爲十段一一方中皆有十事一定方二土海三世界四佛名五主菩薩六眷屬數七至佛所八興供雲九申禮獻供十化座安坐此中應有世界種名略不說耳其東方供雲應有十種而但九者塗香燒香二文合故言

各現者主伴一一皆現也重重無礙各遍虛空一一可觀名不散滅十方化座體相各異而皆同名蓮華藏師子之座者師子之義已見上文蓮華藏言通有三意一約菩薩表合藏開敷故二約所詮將說依報故三約諸會通顯華嚴故上下還於本方坐者佛圓廻身皆見面故異於餘宗但八方故三總結中文有其八一略示前文云如是等二總明海數謂十億刹塵以上來所列是華藏鱗次之海口光各照一億十方故有十也上二段前別中所無三結主四結伴五

結來至六結興供七結禮獻八結安坐既爲總結故
闕定方已至會中故闕初海等三事第二如是坐已
下現自在用卽爲歎德謂塵塵近佛念念益生文有
其八一明諸菩薩毛孔現光二光現菩薩三菩薩入
塵四塵含廣刹五刹有如來六菩薩往供七助佛揚
化八所化成益初二可知三中言安立海所有微塵
者略有二義一一切施設依正等塵一一稱真故二
約觀心衆生意識所緣卽是法界例依名相分別而
轉是謂安立妄故爲塵體皆可依是名大刹皆有覺
性是曰如來此明菩薩證入衆生性海四中可知五

隨世俗故說有三世全稱性故並在塵中六中供養
者通財及法七於念念下助佛揚化及第八念念中
下所化成益於中賢首對前開悟以三義釋之一別
配釋二圓通釋三各別釋初者謂以前十法門對後
所成十益一門得其一益二三前却餘金如次一以
夢自在門夢中警覺造惡衆生令得斷惡免苦益故
二以菩薩行門令人正定三以現諸天歿生門令生
天受樂以放逸則歿尅念便生故上三人天乘四以
動刹現無常令厭以歎佛神變令欣成二乘益下皆
大乘五以嚴刹大願令修福求向六以攝生言詞令

發大心以佛音聲卽同體大悲故七以佛雲雨法令入菩薩不退之位已上三位在地前三賢八以照遍滿法界土及神變令得初地已上智眼見平等法九以佛普現遍法界解脫力令得八地已上大力大願無盡智淨國土益十以普賢建道場令住佛果大願海言生如來家者入佛果位故生非是初地已上生佛家也二圓通者此上十法於此十益一一遍通謂或一法成十益或十法成一益如是互遍無所障礙三各別者謂前十法門各自開悟世界海微塵數衆生此以法爲益後十益但言須彌塵數不言剎塵之

國則是已身以人爲益旣各別釋則夢自在門亦顯一切皆如夢故延促等無礙故云自在餘僉可知此上菩薩法化始從放光終於得益順數八段若逆推十二重疊無盡一其十須彌塵數衆生得益方在一國餘一切土皆爾故云一一國土各令等也二此一切土益在一念時中餘一切念時皆爾故云念念中也三如是念念之益方是一法門所開悟一一法門皆爾四彼多念法門方是一念所用餘念念所用法門亦爾五彼多念法門方論一廣剎如一廣剎如是十剎塵數廣剎皆爾六彼多廣剎方論一塵內如一塵

一切安立中諸塵亦然七如上諸塵方是一安立海
如一安立海遍法界諸安立海亦然八遍法界安立
海中業用方是一化菩薩所化如一化菩薩十世界
海化菩薩一一皆然九諸化菩薩方是一光所現如
一光一一光亦然十彼十剎塵數光明方是一毛孔
現如一毛孔遍身一一毛孔皆然十一彼遍身毛孔
方是一菩薩如一菩薩有如是十億佛剎微塵數各
世界海微塵數菩薩遍身毛孔皆爾十二上來所明
十一重用方論來此一會如此一會於餘佛會亦
復如是此後一段偈文具之又上十二重一一開之

爲二便成二十四重且如一念望一切念卽是二義
類例相似合之爲一餘十一重準此思之如是重疊
無盡各周法界唯智頓觀非心識境華嚴海會大用
皆然第三光聲自述前旣光聲召命今亦光聲自述
菩薩位極用窮深廣若非自述時衆難知十頌分二
初一總明兼陳說處後九別顯德用殊勝文分爲三
初二通顯體用自在初偈悲智相導度衆生而不疲
次偈空有雙觀入法門而常寂後偈物我無滯故化
他而自清次五頌別叙前現自在與前影略一身遍
十方智觀寂滅卽顯不唯來此會也二身光普入智

眼遍觀三住一毛端遍動諸刹況乎於上處寶蓮華
四塵塵多身門門化異舉一殺生門可以例諸五念
劫無礙結由證深念劫既融故於念念能作法性無
礙者分與無分皆無礙故謂證理不唯無分故在一
切處而全在一法一切法亦然各有四句身等不唯
分故常在此而無不在思之後一偈結廣有歸普賢
勝行皆入非獨向來所陳故能光中演斯自在大文
第四現瑞表法上所現相但召有緣衆集將陳故重
現斯瑞瑞文有三初光示法主二現華表義三現衆
表教法藉人弘故先明主義爲教本故在教前今初

示主文分爲六一意二體三名四相五展六收今初
可知二放眉間光卽光體也眉間者表離二邊故於
體不計有無二邊於義不著常無常等諸法相邊於
行不習苦樂二邊於道不住邪正二邊於人不執因
果二邊於教不說世出世二邊於諦不見真俗二邊
於化不定權實二邊是故爲衆放眉間光三此光下
辯光名菩薩智光者令得能知智也普照十方藏者
令照所知境也藏有三義一智光含德無盡故二以
十方刹海各於塵內重合諸刹故三亦通於五藏以
言智光故照初二藏令菩薩證照初二藏令菩薩成

證則得於涅槃成則得於菩提照第五藏令化令淨
三中後二如下業中四其狀下顯相謂色如燈雲猶
日月洞照周遍潤澤雨法雨故具如相海品五遍照
下展卽光業用於中分五一所照分齊謂盡十方一
切佛刹二光所現謂土及衆生三動刹網以諸世界
重疊影現交互相當猶如網孔四塵現如來五隨機
兩法略舉三法皆下所顯初法輪雲示其所行二出
離雲示其所度三大願雲示說法主謂將說普法令
知法主大願普周刹塵內故第六作是下收則示有
終歸證從佛流眉間出光修因順果故須右繞自下

升高故從足入履佛所行方證入故第二爾時佛前
下現華表義文有二別一總標華現爲坐所現中方
衆故通表所詮佛華嚴故別表華藏佛所淨故故於
佛前出此蓮華旣通表華嚴亦具同時具足等十門
及教義等而其本意正表義耳忽然現者依理起事
難測量故二其華下顯具德嚴文亦有二先標十種
顯德無盡後所謂下別列十句前六體備衆德後四
妙用自在今初蓮子住處有含藏之義故名爲藏表
示法門一含一切華藏之名由此而立後妙用中一
念況多摩尼寶王卽前藏體影現佛身卽依正無礙

撰述一
既發多聲聲皆演法第三此華生下現衆表教文略
有三一現衆時言一念者華生無間表教義相應二
現衆處謂白毫中表教從所證淨法界所流爲衆教
源如白爲色本三有菩薩下正明衆現亦分爲三一
主屬齊現遍詮諸法故云一切所詮圓滿是曰勝音
圓教法門必攝眷屬故下文云世界海微塵數修多
羅以爲眷屬權實無礙故曰俱時二右繞下申敬就
座主伴雖殊僉修因順果故右繞如來文義相隨故
依華坐正助不等臺鬚有差上義依理明故忽然而
現今教由人立故衆從佛流亦如涅槃從牛出乳三

其一切下彰其德業主教是宗故偏歎主文有十句
略爲二解一豎配十地此明普攝十地功德一句一
地初地歡喜得智證如二地性戒是佛所行三地多
聞入法身海四行道品善友是依五地雙行現通利
物六觀法界般若現前七功用已終故佛與力八無
生無動住三昧心九爲法師見無邊法十具於大盡
三昧等圓初地尚攝諸地功德況於後後不具前前
二橫就極位釋者一理智了真二量智入行三證窮
法身四常觀受用五毛現神變六念觀法門七外感
佛加八內安身定九豎見來際十橫無不圓故此十

何攝爲五對若橫若豎能證必具故爲二釋

大方廣佛華嚴經疏卷第九

音釋

模莫胡切頤毘賓切拊斐父切咀在呂切塗同都切促

模模範也 頤頤切 拊彈也 咀咀嚼也 短也 歿莫勃切 耆婆此云能活

丹陽居士賀懋熙懋照懋瑩懋懋壽懋焯仰承

其一二三四五

大方廣佛華嚴經疏卷第十

其一二三四五

大方廣佛華嚴經疏卷第十

唐清涼山大華嚴寺沙門 澄觀撰

大文第五稱揚佛德既現既至任力稱揚自申罔極
之情顯佛無涯之德文分爲二初一眉間菩薩讚後
十十方菩薩讚新衆纔集佛便現瑞文不累書故編
成次以讚德相類結集併之一處乘現勝音之次先
舉勝音之偈後十菩薩卽如次十方昔人不曉斯文
便將後十爲勝音眷屬非唯章疏之失亦乃翻譯有
違何者且眉間出衆卽主伴皆讚十方來衆寂無一
言主伴禮儀一何踈索況準法界品例來者皆有讚

詞細尋菩薩之名與前十方如次相似但由譯人不
審致令各小乖差至下文中一一對辯今初勝音文
分二先說偈儀後正說偈下十例然偈中總相讚佛
亦舍諸問思之可知十頌分三初三直就佛歎次六
約衆歎佛三有一偈雙結主伴初中三偈皆歎如來
體用無礙於中初一不動本而周遍則十身圓融遍
四法界後二不壞小相而廣容上則事如理故此則
事合理故於中前一偈半一毛攝三世間後半類餘
謂遍法界內皆有佛身無有一毛不含刹海又一毛
表解脫門諸佛菩薩智所住故現多刹海者門門皆

是淨土因故次六偈約衆歎者聖賢輔翼顯主勝故
六偈總明主伴皆遍於中初二總身總相遍後四總
身遍別中既微細難思故唯普智方知普行方立三
雙結可知第二十方菩薩讚德十方卽爲十段今初
東方言衆中者大衆海中前列名處名觀察勝法蓮
華幢幢相高出王是超勝此喻相似光慧卽是所喻
幢體偈中讚佛真應二身密答上佛地如來智等攝
佛地故十頌分二初三讚真後七讚應讚真必體用
雙美讚應唯約用明欲顯門差實非體外今初也於
中初一讚智身次一讚法身後一雙結智舍四智法

卽法界五法具矣智中上半正體證真下半年後起隨俗又句各一智初句大圓鏡智行相深細故次句平等性智自他平等卽法界故次句妙觀察智於自共相無礙轉故未句成所作智成就利他導世事故二讚法身中上半體相皆同有二義一本性法身體同言無依者無住本故無差別者體無二故二已證法身相同力無畏等皆無異故此則無礙慧身不依一切離諸分別是無差別下半用同能現能生身土智影皆無二故卽法身無色應物現形三雙結者上半結智上句根本下句後得下半結法但舉其用體

通上下以智契如故金光明說如如及如智爲法身故後七讚應分三初一隨樂現應不思議者隨緣無邊故光明覺云億那由劫共思量色相威德轉無邊等次四身光演法初一化身演法望前應身卽重化也次二毛光演法後一結歎難量法輪義如別說後二偈成道起通上皆圓融亦有十身且從一義耳第二南方法喜菩薩前雲集中名普照法海慧會義亦同光明卽照法故十頌歎佛寂用應機德答前境界法身顯現卽分齊境無生無體卽所觀境衆生國土皆所化境於中分三初四依真起應於中分二先

一偈顯真佛身常者第一義常出三世故智符於理
湛然常照顯者離二障故現者常在前故不同衆生
自體常也法界悉充滿者諸根相好一一無邊無限
福智所莊嚴故次二句音恒用普恒自受用廣大法
樂故下三偈起用初一普隨物樂次一感應道交後
一法光無際二有三偈體用無礙於中初二句約相
無生現生次二句約性無住而住次一偈約用無去
住而普周後偈體用雙拂謂無體拂上無生無生爲
佛法體故今體卽非體無住處者拂約性二句亦無
生可得拂示生句下半拂前第二偈約用用如影故

三有三偈明真應無盡一法雲無盡二衆會無盡三
身相無盡無盡相言兼真身故終不盡者全同體故
第三西方香焰菩薩前名月光香焰普莊嚴此中光
卽月光明慧卽是智慧莊嚴十頌讚佛身舍衆海卽
答加持問由加能入故於中前九讚衆海則佛德可
知後一結德歸佛前中初一總餘八別別中二前四
平遍一切於中初一智身入刹塵次一色身普現用
後二釋成前義一普賢行圓故二身心平等故後有
四偈明微細入於毛孔刹中而作用故後一結中非
唯一會一切菩薩皆入佛身方爲讚佛第四北方菩

一偈 十
四
用十
薩此同本名但加慧字然此十頌歎佛依體起用轉
大法輪答前佛行佛以轉法化生爲其行故文中分
三初二句總次八偈半別後一偈結別中讚佛十化
初二句現受生化處處受生身雲遍故次一偈讚神
通化末句雖云轉法意在通用三有三句讚業果化
一切諸刹名號不同者示同趣類業報名字故上三
依身四隨應演妙法者卽辯揚化隨應則能斷彼疑
故五一偈勸讚勵化妙音讚勵故六一偈慶懌化普
雨法雨令彼進修無生法故上三語業七有一偈領
受意化領問受取演昔行故八有一偈決擇意化決

擇有情心行差別及揀諸法性相不同方能普化故
九一偈發起意化發起宿善及三乘大行爲善調故
十有一偈造作意化建立佛法事義種種皆令見故
依實起用卽是化身故說化身無別心色此之十化
與佛地經次第無違但令相融不違經旨末後一偈
結歸斯會可知第五東北方方法海菩薩前衆集中各
最勝光明燈無盡功德藏法海可當最勝光明義與
慧同功德藏名前後無別無盡二字前有後無十頌
讚佛攝勝眷屬答佛力問寄讚菩薩實由佛力故結
云住力地中文中初一智滿得法卽爲總相如是方

便門者此有二意一指前誦具前三輪之化故能周遍一一國土二卽下九別爲如是方便也餘九別相共讚七事一讚普演大音有三種大一者處大一一國故二者義大說佛所行故三者體大周聞十方故二讚時無空過念念觀法證真實故三能入勝處諸佛身中修淨國故四於染無礙塵中證法而周行故五能入佛境見佛神力入行處故行處有二一智行處謂十力境二佛化處謂器及衆生六有三頌善入音聲初入大音次入妙音後入一切音七一頌善知諸地言從地者卽出心也而得地者卽住入也力地

中者卽佛地也所獲法者結上方便也第六東南方慧燈菩薩名全同前十頌讚諸菩薩悟入深廣由三昧力見佛三昧卽答三昧問也於中分四初二歎見佛真體一見佛離相二見佛自在言離衆相者般若云離一切諸相則名諸佛慈氏論云但離四相卽離一切謂名義自性及差別也言自在者由菩薩定慧雙運故見佛自在也次四頌明悟法一證深理法願力而現二悟多行法福智成形三達果法體無不遍四了教法深廣難知三有二頌歎身業普應一深二廣云堅密者齊佛體用堅卽金剛之身密謂三密之

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

一卽一而多故遍一切卽大而小故現塵中無功之
 應故無相而現若約法門此身卽如來藏性也不可
 破壞故堅深而難見故密衆生塵心無不皆具本自
 有之故曰無生體絕百非故曰無相衆生六根是謂
 諸國四後二頌歎得佛加持一此佛力二餘佛力第
 七西南方前列名處云普華光焰髻少同多異十頌
 歎佛攝生自在德答前自在問文分爲三初六攝生
 無遺次二寂用無礙後二大用無涯今初文二初二
 能攝謂身語深廣前偈語後偈身身中上半體客塵
 不染故下半用隨物見異故亦是釋疑爲物現相不

乖如空後四偈所攝初偈何人能了內信外攝者次
 偈以何眼見唯勝非劣次偈了見何法謂一切法地
 地三心後偈何位究竟菩薩地盡至入佛海次二寂
 用無礙中初偈用遍出興體無來往後偈卽用恒寂
 隨解自差後三大用無涯者初一毛皆普現通後
 一一身各遍轉法第八西北方菩薩前名無盡光摩
 尼王此云威德慧卽摩尼王法喻異耳十頌歎佛出
 現說法皆周遍德答無畏問說法無畏故於中分三
 初二總顯身光遍應次七辯其所作後一結用歸本
 辯所作中分二初三明光照無遺後四演法周遍一

撰述
大方廣佛華嚴經疏卷第十
月一
遍塵內外法界剎中二遍佛身中一切剎內三明所
轉性相四明能轉圓音後一結用歸本不可得故第
九下方菩薩前名法界光焰慧此云普明卽前光焰
十頌讚佛境界勝用菩薩能入答神通問文云各各現
故於中二前三顯佛境界勝用先半偈標其體謂妙身
色相後二頌半辯其用後七菩薩能入謂入佛境界
於中三初二具德故知見次三知見成益後二結用
速疾並可知第十上方菩薩此與前名顛倒而已十
頌讚佛圓音現身神變自在答無能攝取問謂此願
力普周無能令不取故於中分三初三頌歎佛圓音

雨法德然具十義一唯一妙音一梵音故二遍聞一
切稱法性故三此一卽多事理融故四彼一一音雨
多法雨五彼法各具一切文詞六各同一切衆生之
音七此音各各遍一切處八所說各顯性淨之理九
各令一切普得見聞十各各皆得究竟之益上之十
義從一妙音展轉開之具十無盡方曰圓音文處可
見次四歎佛現身無礙德初偈解脫力故現處周細
次偈法身力故現相卽虛後二偈以般若德發揮前
偈初偈釋下半言影像者顯無方所故謂光東則影
西光西則影東質對像生來無所從質謝像亡去無

所至故此影像卽空無體後偈釋上半言如空者不可取等故故雖現形猶如水月平等如空後三歎佛神變自在德一則毛孔廣容二則願能普遍三舉少況多又上略配十句其中具有四十句意不能繁指第六大段結通無窮分中分二初舉此二應知下類彼言四天下者意在闡浮言總意別旣以結通菩薩雲集尤顯上歎是彼十方遠方便竟

普賢三昧品第三

入第七經初

將釋此品四門同前初來意者前衆旣集光示法主今將說法是故法主入定受加爲近方便故次來也

二釋名者普賢明說法主以說普法故三昧是業用以非證不宜故此別人法合舉普賢之三昧亦此三昧是普賢所有又三昧境界名爲普賢一切如來藏身爲普賢故此則普賢卽三昧揀餘定也若準梵本普賢三昧威德神變品威德神變皆定之用攝用從體但云三昧也縱佛加光讚皆因定故餘會入定受加起定卽說同爲一品今此開者文多義廣勸修學故言義廣者建立普賢之行願故故此比餘麤相而說四同六異言四同者入住加出言六異者一數異餘會入起唯一此會入起俱多故二者類異類餘方

故三利益異定起多人益故四光讚異如來毛孔光明讚故五衆請異從定起已待衆請故六證相異餘會經終方有證相此品益已卽便地動雨雲等故四五二種十地雖有而不具六今此具六故別立品以此說果餘皆因故又爲諸會本故總故七八九會雖是果定說通因果又非總故三宗趣者入法界定法界佛加爲宗令法界衆成法界德爲趣望於後品亦說世界海爲趣四釋文者文有六分一三昧分二加持分三起定分四作證分五毛光讚德分六大衆偈請分初中有二一明此界入定二類通十方就初分

三一承力入定二彰定名字三明定體用今初有六一時說偈竟時二主顯佛普德唯普賢故三處依如來者常對佛故四所依座大集云菩薩得蓮華陀羅尼故說法處皆有蓮華表所入三昧自性無染合果法故五所依因謂所入深廣要承力故六正入三昧心境冥故二此三昧下彰定名字毗盧遮那前已廣釋復有釋言廣大生息具此三義名如來藏身身卽體也依也此有二種一者修成二者本性本性者凡聖俱成修成者唯諸佛有諸佛有者慈悲無邊故名爲廣智慧無上故稱爲大生相已盡故云生息涅槃

云離有常住故名如來萬德含攝是謂藏身卽是出纏之法身也言本性者謂卽藏識包含種子建立趣生故名爲廣本覺現量與佛等故名之爲大新新生故名之爲生染淨苦樂所不能動故名爲息卽上法身在纏名藏謂空不空空爲能藏藏不空故若以光明遍照解毗盧遮那毗盧遮那卽是能觀大智如來藏身卽所觀深理凡雖理有佛智方照又毗盧遮那亦通本有本有真實識知遍照法界義故斯卽本覺迷而不知不得其用唯佛覺此能無不爲故云一切諸佛揀非凡也亦非因也顯於依正離如來藏無別

自體故入此也賢首釋云諸佛過於一切卽顯諸佛無不周遍法界刹海及彼塵中所有諸刹諸刹塵中復有諸刹如是重重不可窮盡言如來藏身者明卽此遍刹之身包容所遍法界刹海無不皆在如來身中故名藏身是故融通總有四句一身遍刹海二刹在身中三身遍身內刹四刹入遍刹身卽內卽外依正混融無礙無障是此三昧所作故以爲名將說此法故入茲定三普入下明體相用此定相用無量無邊皆悉依於如來藏說略舉其要句有十三門乃有十以後二門收五句故攝爲六對後之二門各一對

故文有四節義唯有三至下當明言六對者初二句明體用一對謂無分別智證平等性以爲定體影現法界爲勝用也謂以因因性證彼因性成彼果性顯果果性如是佛性則具七義一真二實三善四常五樂六我七者清淨生佛之性本末不殊況佛果果豈不平等佛平等性卽如來藏是故但入如來藏身卽是已入佛平等性此爲第一契合佛性門也言勝用者卽示衆影像門謂能現能生身上智影也次二深廣一對廣者無邊不在內外故大者無上究竟實際故無礙者無所障故同於虛空成上三義通爲廣大

無礙門後句卽入法海漩渡門漩卽深也三有二句出納一對初出生三昧門謂若自相若共相等一切三昧皆從此生此爲諸定本故後攝受法界門終歸此故法界體性故四有二句境智一對初句能成佛智門謂不體此理非佛智故後示現諸境門然安立言總有三種一者世界安立依報二者聖教安立妙義三者觀智安立諦相皆法界藏顯示現前五有二句卽依正合容門爲內外合容對謂內含因果智力外令塵容法界由塵全依法界藏現同真性故六有三句卽成就攝持門爲成持人法對謂初成果人功

撰述
德大願後持法輪令不斷絕由斯玄理法眼常全故
上言四節者初四句明無幽不入釋上毗盧遮那遍
照之義次四句無德不生釋上一切諸佛之義次二
句内外合容釋上藏義後三句成德持法釋上身義
言義唯有三者體相用也入平等性是定體也廣大
同空是定相也餘皆定用此三圓融總爲無礙普賢
三昧二如此下類通十方及諸塵道於中有二初舉
此後如是下類彼類彼中二初明平遍法界後明重
疊無盡前中十一句初一總明謂盡窮法界後十別
指以彰曲盡一盡虛空界二於空中盡十方處三於

十方中遍三世時四於三世中微細物處謂毛端等
五凡諸小隙無礙之處六或廣大百千由旬等處七
人天日月光明等處八盡佛眼見處九盡神力到處
十佛身能現之處此第十句有二義一者結上國土
之言通十一段二者成下以是身內之刹爲微細故
二及此下重疊遍中略有四重一盡法界塵言及此
國土者指前十處之國也二塵中多刹三刹中多佛
四一一佛前有多普賢於上諸處皆入此定故普賢
身不分普遍麤細深廣平滿重疊此處入定類通既
然法界入定類通亦爾故約主定佛前唯一普賢一

一切故若就類通佛前各有塵數一一切故第二爾時一一下加分有三初口加次意加後身加初中有四一諸佛現前以此口加後無結通故此總舉重重時處一一普賢前也二彼諸下讚其得定此雖果定菩薩門入故云菩薩三昧三佛子下明得定所由所由有三一伴佛同加佛佛道同故二主佛本願此二爲緣三自修行願是入定因又上三義前前由於後後餘豈無斯行耶法門主故表說普法故四所謂下辯加所爲此文二勢一辯加所爲二顯上行願之相故云所謂也所爲謂何爲轉法輪故有十一句初總

餘別別中初一總攝十智餘九卽是十海一卽安立海二卽衆生及業海三卽世界海四卽佛海五卽名號壽量及解脫海變化大用皆功德故六卽波羅蜜海到實相岸故七卽轉法輪海八卽根海九卽演說海與下十智令知此十二爾時下明意加於中有二先加後釋前中亦二先此土後類通前中與十種智初一總謂與果海之智而言與者佛力灌注令增長故一切智性卽果海也智性卽力無傾動故具十力故末後智字卽能入也餘九爲別卽是成就品中十智由與此智故後能說彼智觀彼十海而文少不次

一卽第三法界安立海智安立無邊量故二卽第四
佛海佛海唯佛分齊之境三卽第一四卽第二衆生
業海業因微細故云廣大五舍二句一卽第八佛神
變海解脫作用卽是神變神變依定加三昧言一舍
三世智下文一念知三世由佛不思議解脫力故由
加總句故合此二六卽第五七卽第九八卽第七願
海以願力故入法界中一切世界九卽第十建立演
說又菩薩根更有多義修十善道有三善根修諸地
度精進爲根攝受正法信慧爲根攝養衆生慈悲爲
根爲成佛道悲智爲根種種差別皆善知故二如此

下類通可知第二何以故下釋所出中二先微意云
諸佛有力能與有慈能普何以十智偏加普賢釋云
普賢得此三昧法爾應與三是時下身加中亦二初
此土後如此下類通前中復二先佛手摩頂明加被
攝受又準梵本明十方佛身皆不來此舒臂不必長
而同時摩頂各全觸頂互不相礙皆是如來自在業
用二其手下辯手相用於中十句以顯無盡前五德
相圓備謂臚纖直等故云相好莊嚴後復出下五句
明妙用自在意明此手亘十方而包三世收因果而
該人法深廣體用無邊自在非言能說也後結通可

撰述
後類通十方前中亦二初起定後眾益前中亦二初起主定二起眷屬定於中亦二初總謂一起一切起由此妙定卽是一切三昧海故餘定爲門皆入此故彼全同此亦受海名二所謂下別辯塵數旣多略列其十一卽能知智三昧謂無一念暫差故云念念無差而不廢遍知爲善巧智二卽所知塵境上能所一對三現廣利四現居處卽於世界總別一對楞伽經云如來藏識頓現一切身器及諸受用器卽廣利受用卽是舍宅五知心念差別六知身相名字卽眾生

色心一對七知廣處八知廣身卽依正一對雖說微塵意彰佛廣虛空無方有物處則現唯如來藏是實物有依此建立處所各別隨菩薩行利有淨穢隨眾生業趣類別故微塵中佛復有一義謂如來藏是真佛身其體廣大無能知者恒在六七微塵之中一有情各有藏識故云各有無邊大身九從知一切法理趣者上八約事別別門顯此約理趣總該諸法故云一切大般若經理趣分說諸法皆空無生無滅無自性性離一切相不可願求然第一義湛然常住當知卽是此如來藏思益經說處處避空皆不離空深

密經說理趣有六一者真義理趣謂二障淨智所行
真實二證得理趣謂於真義得如實知三教導理趣
謂自證已開示衆生此三爲本後三解釋四離二邊
理趣謂有問言云何名爲真義理趣應答彼言非有
非無非常非斷五不思議理趣謂有問言云何證得
應答彼言謂不思議若於諸法遠離戲論爾時證得
真勝義性故知言說皆非真義六隨衆生所樂理趣
謂有問言云何教導應答彼言隨諸衆生意樂各異
順彼所欲方便開示彼真義者卽此藏身彼不思議
卽此三昧無著菩薩說四意趣釋一切經亦理趣也

如攝論辯上來九句唯第三四從現得名餘七皆從
所知立稱如此等類有一切世界海微塵數合爲一
定卽知此定是一切定耳二普賢下大衆得益初標
益時分亦是得益所由後其諸下正明得益減數說
九初五得菩薩法門句各一義皆以前定含此諸義
故又此五句後後成前前後四得佛果法卽如來三
業一得照藏身之實智二得藏身力用之權智三身
毛現刹四應垂八相義兼口轉亦以藏身舍此義故
普賢出定他人益者感應道交故如春萌芽陽氣久
滿東風一拂衆藥齊敷諸菩薩衆積善以深久同行

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

願纔觀勝境萬德頓圓冥顯雙資于何不可二如此
 下類通可知第四爾時下現相作證分然得益心喜
 喜則地動及有諸瑞諸會聞竟得益故現相居後此
 會雖即未聞已先得益故先現瑞以此會辯果顯殊
 勝故文中有四一世界微動兼出瑞因由因果二力
 言微動者是前相故二衆寶莊嚴三出音說法四佛
 會雨寶略舉十種以顯無盡前三事相寶後七法化
 傳通寶並是出世善根所生第五普雨如是十種雲
 已下毛讚德分於中二初結前生後後正顯偈詞
 詞中十頌分三初一總述前定次八別顯遍相後一

結讚所由別顯中二前二偈半直述前遍後五偈半
 舉因顯遍於中二初半偈緣力遍後五因力遍於中
 四初偈即體而用故遍前半體後半用身相如空法
 性身也依真而住法性土也隨機普應受用化也問
 法性身土為別不別則不名法性性無二故不別
 則無能依所依答經論異說統收法身略有十種土
 隨身顯乃有五重一依佛地論唯以清淨法界而為
 法身亦以法性而為其土性雖一味隨身土相而分
 二別智論云在有情數中名為佛性在非情數中名
 為法性假說能所而實無差唯識云雖此身土體無

撰述
一
差別而屬佛法性相異故謂法性屬佛爲法性身法性屬法爲法性土性隨相異故云爾也今言如虛空者唯識論云此之身土俱非色攝雖不可說形量大小然隨事相其量無邊譬如虛空遍一切處故如虛空言通喻身土二或唯大智而爲法身所證真如爲法性土無性攝論云無垢無罣礙智爲法身故若爾云何言相如虛空智體無礙同虛空故三亦智亦如而爲法身梁攝論及金光明皆云唯如如及如智獨存名法身故此則身合如智上則唯如四境智雙泯而爲法身經云如來法身非心非境土亦隨爾依

於此義諸契經中皆說如來身土無二此則依真之言顯無能所方曰依真成如空義五此上四句合爲一無礙法身隨說皆得土亦如之六此上總別五句相融形奪泯茲五說迥然無寄以爲法身土亦如也此上單就境智以辯七通攝五分及悲願等所行恒沙功德無不皆是此法身收以修生功德必證理故融攝無礙卽此所證真如體大爲法性土依於此義身土迥異今言身相卽諸功德言如虛空卽身之性下經亦云解如來身非如虛空一切功德無量妙法所圓滿故八通收報化色相功德無不皆是此法身

收故攝論中三十二相等皆法身攝然有三義一相
卽如故歸理法身二智所現故屬智法身三當相並
是功德法故名爲法身其所依土則通性相淨穢無
礙我此土淨而汝不見衆生見燒淨土不毀色卽是
如相卽非相身土事理交互依持通有四句謂色身
依色相土色身依法性土法身依法性土及依色相
故又以單雙互望亦成五句謂色相身依法性色相
土等準以思之此上猶通諸大乘教九通攝三種世
間皆爲一大法身具十佛故其三身等並此中智正
覺攝故土亦如之卽如空身而示普身于何不具此

唯華嚴十土分權實唯有第九屬於此經若據融攝
及攝同教總前九義爲一總句是謂如來無礙身土
普賢亦爾義隨隱顯不可累安達者尋文無生局見
上言土有五重者一唯法性屬前三身二者雙泯屬
於第四三具性相五六七八所依四融三世間屬於
第九五總前諸義卽第十依二普賢安住下一偈半
大願故遍兼顯遍於正中之依也重重皆遍今不見
者機不應故不見卽是虛空身故亦遍不見處故三
有一偈半明所現超勝四有一偈果德已滿不捨因
門第三一偈結讚所由者自在難思現無不普標入

170 1 2 3 4 5 6 7 8 9 180 1 2 3 4 5 6 7 8 9 190 1 2 3 4 5 6 7 8 9

一定實則普游非佛光雲安能讚述第六大眾讚請
 分前眾問佛佛示法主眾覩定起故讚請普賢前但
 舊眾此通新舊故云一切所問同前故但略舉十頌
 分三初二歎主請彰其能說次一舉法請正陳所疑
 後一歎眾請明有堪聞之器前中二初五頌歎普賢
 因果深廣德明有說因後三歎能遍塵刹雨法德明
 有說果今初偈各一義初一讚已淨法身三句明因
 一句明果因有三義一因修法生義通緣了二由大
 願起卽是緣因三依如來藏證真平等此爲正因真
 如卽是不空虛空卽是空藏平等與藏通上二義二

讚遍任佛刹第三句遍因餘皆遍相因中具智莊嚴
 故能等照具功德嚴令無不覩三讚近佛四讚常定
 實境中者不隨想轉故曹者輩也五讚度生曲盡微
 塵者細處有多眾生故二有三頌說法果中初一讚
 常演大法如空之言下喻廣大前喻無盡無差次一
 讚說無等法無等有二一能說力勝具二嚴故二所
 說無等說佛所行故後一頌舉因結果顯德有由曠
 劫因圓故故能雲雨說法二一頌舉法請中前品所
 問雖有參門統其要歸莫過三種世間故今三句各
 顯其一又前問總該諸會此令當會答故末後一頌

歎眾請亦名自述此有二義一恭敬一心內堪受法
二諸佛隨喜外有勝緣故應說也說則上順佛心下

隨物欲

大方廣佛華嚴經疏卷第十

音釋

勵力制切

隙乞逆切

臍丑凶切

藥如累切

花

泯

彌盡切

丹陽居士賀懋熙懋熙照懋懋瑩懋懋壽懋焯仰承

先嚴賀學禮遺願施費刻此


大方廣佛華嚴經疏卷第十

零六十六箇 該銀四兩一錢八分三釐

海虞為子契慧 淨住沙彌契機同對

崇禎二年夏月徑山化城寺識





八ノ二